


BUPIKUDI MU

KAABUJIMÀ, MU DISÀNKÀ

 Ndi ne disànkà dilòòlò edi, cyàkàbìdì, bwà kunùsekela mu Dinà dyà Mukalenge wetù Yesù mulenga, Mwànà wa Nzambì mubìike ku lufù awu. Nènku Bwikadi Bwèndè bùkaavwa mwab'ewu pândì mubwele apu, pa nàнку tudì batèkèmenè ne netùmonè byà biyiila ne panshi, byà bibòdyòdyòke: “kumutù mene kwà byònsò bitùdiku twètù bafwànyine kwenza anyì kwelela meeji abi,” dilòòlò edi, byàpòngololà Nzambì pambidi pèètù, bwà mabènesha Èndè, ne bwà kutùmbisha Yesù Kilistò munkaci mwètù.

² Mvwa munkaci mwà kwakula malòòlò àbìdì mashààle aa... Mu dyàlumingu dilòòlò ngèèla meeji ne tuvwa ne mudimu wà dyondopa, ne mu dimwè dilòòlò mvwa nyiisha. Nènku mvwa mumanyìshe... Mvwa mutwàdije cyena-bwalu kampànda, mu dyàlumingu mu dindà, mu tabernacle emu. Ke mèmè kudyàmbidila ne, patùcìvwà munkaci mwà dindila bwà musumbà wà bantu wenzèku bu ùdì ùvula ndambù mukesè, Mvwa mufwànyine kwambakù mùndì ndyumvwa. Ndi... .

³ Dimwè dyà ku matùkù àdì panshi aa, bu Nzambì mwà kwanyisha, ne munkwàcìshekù, ndi muswè ànu kwenza tumpànye twàbùngì mùdì—mùdì kùyì... mùdì ànu ubwela ne uyiisha anyì ulongesha Mifundu, ne wenza mabìikila à ku cyoshelu, ne uya ku cyoshelu bwà kasambidila bantu, mutùvwà twètù ba-Baptistes bàà cyena-kale aba ne ciibidilu cyà kwenza amu. [Muntu kampànda ùdì wàmba ne: “Amen.”—Muf.] Ànu ba-Baptistes bàbìdì ki bândì muumvwe bàmba ne: “Amen.” Kàdì nwèntù bwònsò nudi penyì, dilòòlò edi?

Muntu kampànda ùvwa wàmba ne: “Mwanèètù Branham, wèwè ewu uvwa Baptiste anyì?”

Mèmè ne: “Èyowà,” mungààkambà.

⁴ Mvwa nyiisha mu Arkansas emu, musangu kampànda. Muntu kampànda, mukùlumpè, kwondopiibwayè. Ùvwa... . bàvwa ne... . Ùvwa Nazaréen. Ùvwa ne mabaya èndè à balèma awu meela paanyimà, ditùkù dyàkalondà, wènda ùnyùnguluka mu cimenga cijimà amu, ne ci—cimanyinu cifùndapù ne: “Nzambì mmunguumushe ku eci, makèèlèlè dilòòlò.” Ne yèyè ùvwa mucibùkile panshi bibi be. Cìvwa mmu Little Rock mwàmwa. Ne yèyè ùvwa mùshindù awu munda mwà bidimu mulongolongo. Ne muntu yònsò ùvwa mumumanyè, bwalu ùvwa ùnyùnguluka, ne cifulu cyèndè citèèka panshi, ùsùmbishila crayons mu cifulu amu. Nènku muntu yònsò

wàkadì mumumanyè, ki kutwàdijabì ànu, kwenzabì ànu cintu kampànda cinène mu cimenga.

⁵ Nènku ndambù wa malòlò paanyimà pàà cyòci aci, mvwa munkaci mwà kuyiisha, ke—ke kulàndapukayè. Kwambayè ne: “Anjì indila kakesè, Mwanèètù Branham, bìdì mwà kukutàcisha bu mèmè mwà kukukonkakù cintu kampànda anyì?”

Mèmè ne: “To, mukalenge.”

⁶ Ki yèyè ne: “Èè,” yèyè ne, “pâmvwà—pâmvwà mukuumvwe uyiisha apu, mvwa mumanyè ne wèwè udi Nazaréen.” Yèyè ne: “Dìbà adi mèmè kumòna beena Mpenta bwònsò bakunyùngùlùkile, ke muntu kampànda kungambilaye ne wèwè uvwa mwena Mpenta.” Yèyè ne: “Ngùmùvù wamba, katancì aka ne, wèwè ewu uvwa Baptiste.” Yèyè ne: “Ncyèna ncyùmvwà to.”

⁷ Mèmè ne: “Èè, aci’s ncipeepèle. Mèmè ndi Nazaréen Baptiste mwena Mpenta.” Ncyà bushùwà. Ncyà bushùwà. Tudi ànu. . . twitabuuja.

⁸ Kaa, balundà bàanyì, mèmè ncyèna wa mu dìngumba nànsha dìmwe dyà èkèleeziyà to, kàdì nànsha nànkù mèmè ndi wa mu yònsò wa ku yòyì ayi. Pàmbangìlà mu mudimu ewu, ngàkamba ne: “Kilistò ki wanyì mfùmù. Bible ewu ki wànyì mukàndà wà dibala. Ne buloba ke wanyì èkèleeziyà.” Pa nànkù, aci’s—aci’s ke cìndì muswè kwikala too ne pàngààfwà.

⁹ Mpindyewu, mu dilòlò dìmwe anyì àbìdì, netùteetè bwà kubanga cyàkàbìdì disangisha dyà dyondopa, patwàpeta. . . Mu bushùwà bwà bwalu, pa kumòna tulààlù twà dibùnya ne twà dyambwila babèèdì etu twadija tunyùngùlùke eku ne eku, ndi muswè kumòna cintu kampànda. Ndi ne mwoyi ùzùka bwà cintu kampànda kwenzekaci munwemu mu Louisville, mu Kentucky emu, bwalu emu ke kwètù kundela.

¹⁰ Kacya ncitukù mwanjì kwenza dyà dîmpè, dinùtù nubìkila ne ndisangisha dîmpè adi, mu Kentucky emu to. Ne ncyèna ne meeji à kwamba aci ne didyùla kampànda to. Ntu—ntu mwenze à mabì à dikèma awu bùngì kabùyì kwamba, mu myaba mipite bùngì. Kàdì, ndi muswè kwamba ne, ànu mwètù mùbaamwànà emu, s’mbwalu bukolè. Ndi. . . mbikolè ànu bwà kucìcibula. Ncyèna mumanyè ne mbwà cinyì to. Kàdì ndi ngèela meeji ne mbwalu Yesù wàkamba ne: “Mu ditungà dyèbè dikulelela,” ne mùshindù ùdìbì bifwànyìne kwikala, pànga apa ke—ke mùshindù ùdìbì’s. Kàdì katùtukù ànu banjì kufika ku dimòna bishìma byà pabwàbì bipìtepìte bùngì to.

¹¹ Mvwa ne disangisha kaaba aka, kùkaadi bu cidimu cijimà anyì bìbìdì nànkù awu, mu Jeffersonville emu, kàdì kwenzekabì ne ùvwa mmukàjì uvwa mufùmìne ku Kentucky eku mwaba kampànda. Ùkaavwa mushààle bu lupèmbà, mwenze nànkù, kwambwila ànu mu bidimba byèndè emu kupweka; kuumukila mu cifùkà mwèndè emu kupweka ne ku bidimba byèndè, èyowà’s. Ne yèyè—yèyè kàvwa mwanjì kwendaku to, munda

mwà bidimu dikùmi ne mwandamutekète. Bààbûngi bàà kunùdi bàvwapù dilòòlò adi, ne mbavùluke bwalu abu. Kàdi kwimanyinayè kuulu buludi ne kupàtuka mu tabernacle emu, bîmpè ànu mwèndè ne kale.

¹² Mpindyewu, ndi muswè bwà cintu kampànda kubangaci kaaba aka mu Louisville, mûndi mwà kumòna ditàbuluja dyà nkulunkulu dinyukusha eku ne eku kwà cimenga cinène cinanga eci.

¹³ S'ncimenga ànu bu bimenga bikwàbò ebi; ncyà lwonji ànu bu bikwàbò binùdi numòna abi. Nudi bamanyè ne aci mbulelèlà. Ncyèna mbìpisha Kentucky to; bwalu, mèmè ndi mwena Kentucky, mèmè pàànyì. Èyo. Kàdi cidi—cidi bulelèlà. Cidi ne lwonji. Eci kàdi's ke kumbèlù kwà wiskì yònsò ne byengedi byàyi, ne bintu byà cikisu ne bikwàbò byònsò, byà bwena abi, bìdi byènzeka ànu mu nyùngulukilu wa Louisville, mu Kentucky emu, pa nàнку eci kàdi's kè nkwaswa wa Sàtaanà ewu.

¹⁴ Kàdi tudi mwà kucipandulula tupesetupese ne Èvànjeeliyò wa Yesù Kilistò, bu twètù bwònsò mwà kudisanga. Ncyà bushùwà. Bìdi bikèngela bwà twètù kusanga makolè ètù pàmwè ne kusàka.

¹⁵ Kùkaadi cikondo kampànda, mutangadiki kampànda mumanyike bîmpè mu ditùnga amu, kwambayè, wàkula bwà masangisha aa kaaba aka. Yèyè ne: “Èè, bwalu's mbwòbù ebu.” Yèyè ne: “Pàndi mbwela mu cimenga kampànda, bintu byònsò mu ditùnga dijimà amu bìdi ne cyà kutuùdila masangisha àànyì awu mfranga bwà cyanààna ncyàkuya to. Ncyà bushùwà. Èè, anji elaa yi meeji. Ndi ngèèla meeji kùdi pàmwàpa èkèleeziyà minène yà ba-Baptistes makumi àsambòmbò anyì makumi mwandamutekète mu Louisville emu. Nwamònu anyì? Kàdi mbishi bwà ba-Méthodistes? Ne ciinè aci ncimenga cyà ba-Méthodistes; Bu mùdi Asbury ùsanganyiibwa lwà kuntweku. Ncinyì cìvwà muntu awu mufwànyine kwikala naaci bu yèyè mwà kulwa mu cimenga eci, ànu cyà ba-Méthodistes ne ba-Baptistes nkààyaabò, katùyi tubala ba-Presbytériens ne bakwàbò?

¹⁶ Mpindyewu èkèleeziyà yà Èvànjeeliyò mu kaabujimà idi bûngi kaayì mwaba ewu mu cimenga emu? Tuèkèleeziyà tukesè tùbìdi anyì tùsàtù lwà kwìnshì eku mu mwaba kampànda, ànu èkèleeziyà yà mikesè mikesè, apa ne pààpa, ne yidi mu mvità ewu ne mukwàbò.

¹⁷ Nàнку paùdi ubwelamù, bikèngela wèwè kweyemena pa dikànda dyà mudimu wèbè wà bwambi. Ncyà bushùwà. Nènku nànsha mene. . . muntu yònsò mmwenze ànu bu mwena cidiidi ulwàlwa awu. Bìdi pa dikànda dyà mudimu wèbè wà bwambi, bwà kukòka bwònsò bààbiikila Mukalenge abu. Ndi munange aci mùshindù awu. Mwanèètù, bu ne Yesù

Kilistò kênà cyeyemenu cyànyì mwab'ewu to, kwànyì kúndì mpetela byònsò, díbà adì ncyênà ne cingà cintu nànsha cìmwè cyà kweyemena to. Ncyà bushùwà. Yéyè. . . Pa Kilistò, Lubwebwe lushindàme, mpàndì mwimàne; myaba mikwàbò yònsò nduntekà, bwànyì mèmè. Mbipicìibwe ne mèmè muyiishe mene bantu bàtaanu bándì mumanyè ne Nzambì mmutùme bwà kuumvwa Mukenji, pamutù pàà kuyiisha bantu binunu dikumi bàvwa bakòkiibwemù ku cìdiidì. Ncyà bushùwà.

¹⁸ Mvwa kujinga kumònakù dikùdimuna dyà mucimà dyà cyena-kale, dyà kupweka ku cyoshelu ne kudila kudidilamù adì òmwèpèlè, pamutù pàà kumòna bantu binunu dikumi biimàne, bàmba ànu ne: “Èè, nênganjì kuCiteeta's.” KuCiteeta? Yéyè kî n'Kilistò wa kuteeta to. Yéyè Ngwa kwitaba. Kwikala ne mwoyi anyì kufwà, kutùkina mu màyì anyì kufwà mu màyì, Mwangata nànsha bishi. Ncyà bushùwà.

¹⁹ Mèmè musambile, musambidile bantu binunu dikumi dilòlò edì, ne bwònsò bafwè mu dindà; mààlabà dilòlò nêngiikale mwà kwalukila kaaba aka munkaci mwà kusambidila babèèdì, ngiitabuuja ne Dìyì dyà Nzambì ndyà cyà bushùwà. Ncyà bushùwà.

²⁰ Bu mèmè mpunga ne lufù; ne bantu binunu bitaanu bafwè kukaadi bidimu lukàmà, ne bàkaadi mu Cyendèlèlè ntàntà wònsò awu, babiike ku lufù ne balwè pa buloba, kadi kwamba ne: “Mwanèètù Branham, kwèyemenyikù Cyòci aci to. Yéyè kî mmujaalàme to. Kwèyemenyikù Aci to. Twètù—twètù twàkaMweyemena, kuya; twètù kupangila bwalu.”

²¹ Ndi mufwànyine ànu kwamba ne: “Lekèlaayi mfwilè mu Yesù Kilistò.” Ncyà bushùwà. Ndi nCiitabuuja. Nènku ke mwoyi wanyì mujimà ngwòwò awu, byònsò mbitèkèibwe ànu mu Cyòci aci. Ne mèmè ndi nCiitabuuja ne mwoyi wànyì wònsò, ne ndi muMweyèmène Yéyè.

²² Ne mèmè ndi munangè cisàmbà Cyèndè. Ndi munùangè, nwènù bakwètù naanyì mu Bukalenge bwà Nzambì. Nènku ndi muswè kwimana pàmwè neenù batwàngàne makaaya, ne kwambula bujitu.

²³ Mpindyewu, dilòlò edì; ndi mufile dimanyisha, makèlèlè dilòlò awu ne, mvwa ne cyà kwakula ndambù dilòlò edì, bu Mukalenge mwà kwanyisha. Ncyèna muswè kunùlama ntàntà mupitèpìte bule, kunùcyòkesha to, bwalu tudi batèkèmène. . .

²⁴ Ndi bu mutèèke cilulù cyà myòsà yà mùkòkò kumpàla kwà Mukalenge bwà disangisha edì. Ne ndi ntèkemena ne Nzambì neènze cintu kampànda cyàshishà disangisha edì lwendu kaaba aka mene mu cimenga emu. Wèwè sambilà, enza cyèbè citùpà; díbà adì, pààlwà Cilumbulwidi, tudi bwònsò mwà kwimana kwamba ne tudi benzè cyètù citùpà.

²⁵ Mu nshapità wa 20 wa Ekèsòdè, kubangila ku mvensà wa 7, ndi njinga kwakula ànu katanci kakesè cyanàànà, bu Nzambì

mwà kwanyisha, pa cyà menemene...èè, ndi mufwànyine kwamba ne, kî ncyena-bwalu cyà pabwàci to, kàdi ncyena-bwalu cî—cîmpè. Dyàlumingu dyàshàadi edi, mu kàlaasa kàa Dyàlumingu mu tabernacle mu Jeffersonville, tuvwa babangè, pa: “bupikudi ku Mashi.”

²⁶ Kàdi cîndi nteeta kwenza ncyôci eci, panwikalà baswè kumanya ne mbwà cinyi ndi ngenza cyôci eci kaaba aka. Bâabúngi bàà kunùdi bàtu bamba ne kacya kanütukù banji kummòna nyiisha mu kàmpanyè kàa dyondopa to, kàdi mbwà kiipàcilà kampànda. Ndi ngèèla meeji ne, bu mèmè mwà kufikisha misùukà ku dicibuluka ne kulwa ku cyoshelu, dîbà adi's ndi mufwànyine kupetakù luse kùdi Nzambi bwà mu Louisville, ncyà bushùwà, pàdi bantu bàya cyà bushùwà kumpàla kwà Nzambi ne bàsambila.

²⁷ Nènku, dîbà adi, kùdi bàabúngi bàà ku nwènu balundà bàanyì, bàdi basambila, bajila byakudyà, kàdi bacìina bwà kwangata cinùdi nusambidila aci. Ncyà bushùwà. Nwamònu anyi? Èè, kabyàkwikala ne dikwàcisha bwà wèwè kujila byakudyà ne kusambila, paùdi kùyì ne byenzedi bidì bibifila to. Diitabuuja dyèbè dyònsò, pa buloba apa, kadyàkukukwàcishakù nànsha kakesè to paùdi kùyì mwele cidya muyè lwà pambèlù apu, ne mukùngàmàngàne naaci, ne mucyangàte to. Kwajiki's. Bikèngela ùye kumpàla. Bikèngela ànu upatukè buludi ùcyènzè, nànsha bìshi. Paùdi ulòmba cintu kanà cyònsò, ndà ùkacyangàtè. Nzambi mmwambe ne ncyèbè wèwè, pa nàнку kwàngacikù kantu nànsha kàmwè kàa kashàadile ku aci to. Angàta cyùdi mulòmbè aci. Udi wenza nàнку, ne ujàndula mùlwalwàci. Èyowà. Kudìdingi—kudìdingi kwalukila cyànyimà kwamba ne: “Èè, nèngàngante ciibìdi to.”

²⁸ Nèngàngate cyàkumpàla. Nzambi mmundayè, cyàkumpàla, ke cîndi muswè. Nènku munda mwà bidimu makumi àbìdi ne bisàtù bìndi muMusadile ebi, Yèyè ùtu mumpèeshe kiinè kaaba aku. Nènku ndi...Ne bu mûncidi ànu muMwitàbùùje ne muMunangè, ne Yèyè munnangè, nebùikale ànu mùshindù awu bwalu Yèyè mmuswikùibwe ku Dîyi Dyèndè. “Bintu byònsò byùdi ujinga, paùdi usambila, itabuuja ne udi ucipeta, neùcipetè.” Ki cyàkambàYe ncyôci aci. Ncyà bushùwà anyi? [Disangisha dîdi dyàmba ne: “Amen.”—Muf.] Abi's mbîmpè. Èyo.

²⁹ Mèmè ntu muswè kunùmvwa nwamba ne: “Amen.” Nudi bamanyè's, Mwanèètù wa bakàji Hoover, *amen* mbwena kwamba ne “bùikalè nàнку,” bwànyì mèmè, nudi bamanyè's. Nènku pàndi—pàndi nditwa mu dyakula, nciyi ngùumvwa muntu nànsha umwe ùtwa “amen to,” ndi—ndi ngùumvwa bintonda bibi be.

³⁰ Mwab'ewu kùkaadi cikondo kampànda mvwa nyiisha mu kaèkèleeziyà kakesè kampànda, ne—ne mvwa ànu...Kaa, ncyèna ne ngenzèlù yà maalu yà bukàlàngà yàbúngi yà ku

cyambilu to, bilondèshile, ngèèla meeji ne, tèòlòjì wa ditùkù edì, pa nànkù ngèèla meeji ne mvwa musùlùkàkù ndambù. Nènku ngèèla meeji ne mèmè kutupika pa cyam- . . . pa cyambilu, mùshindù *awu*, ne kupyà cikòloko mu cianza cyànyì, ne kusòmbapù, ne makàsà àànyì malembèlèlè àdikupa eku ne eku, mumònàngàne ne kuyiisha ànu bikolè ne mwànyì mwònsò. Pangàakaalukila mu mèmè; ncìvwa mumanyè cìmvwà ngèenza to. Mu tusunsa tukesè, mèmè kujimina cyàkàbìdì, ki mèmè kudisangana munkacì mwà kajila kakesè amu, ngenda mbunya mikòlò yà mupanù wànyì. Ncyèna mumanyè ne mbwà cinyì to, kàdì mvwa bulelèlè. . . Mvwa mwà kujinga kushààlapu katancì. Ke cintu cìmwèpelè cìndì njinga kwamba ncyòci aci. Cìvwa mmwaba kampànda ùmvwà bushùwà nsànkila mèmè mwinè. Cyàkashààla naanyì munda mwà matùkù mulongolongo àkalondà.

³¹ Kwàkalwa muntu kùndì, kwambayè ne: “Amba túng,” mwàkambàye, “mmunyì mùdì mwà kuyiisha, ne bantu bwònsò abu bàtwa: ‘Amen?’”

Mèmè ne: “Ke cìdì cyèenza ne nyiisha ncyòci aci.” Èyowà’s.

³² Kale wàwa mvwa ne mbwa wa kale. Mvwa nzoomba nshimbà. Ngèèla meeji ne ndi ne balundà bààbúngì bàà cyena Kentucky mwab’ewu bàtù baswè kuzoomba nshimbà. Pa nànkù. . . Nènku ùvwa mwà kufikisha cintu kanà cyònsò bwà kusokoma ku mucì, ne kuya kacikwàta, pa kuumusha dyòbù; nènku yèyè kàvwa mufwànyine ànu kwikala naadì bwalu to. Mpindyewu, ùvwà umunyemesha too ne mwinshì mwà bisuku bìlebìlè. Nènku cintu cìmwèpelè cìvwà cikèngelà bwà mèmè kwenza, ncìvwa muswè kubwela mwinshì amu paanyimà pèndè to, mvwa mutwishìibwe. Nànkù cintu cìmwèpelè cìmvwà mwà kwenza, cìvwa ànu kubàndulula bisuku abi, ne kumutuuta cianza paanyimà ne kusàma ne: “Shikwàte, mulùmàyànà! Shikwàte!” Nènku ùvwa mwà kuya kukwàta dyòbù adi.

³³ Mpindyewu dyòbù ditàmbe bubì dìndìku mumanyè ndyabùlù. Nènku wèwè muswè kwenza kaadituuta kakesè, ela ànu lubìlè na “amen” ku musangu ne ku musangu. Nènku ndi—ndi. . . Netùmufikishè ku disokoma mu micì, paanyimà pàà katancì, ne netùye kamupeta. Nwamònu anyì?

³⁴ Nudi bamanye’s, mukùlumpe Buddy Robinson, bààbúngì bàà kunùdì bàkaadiku bumvwe bàmba bwalu bwèndè. Kì mmwòmò anyì? Èkèleeziyà wa ba-Nazaréens. Yèyè kwamba ne: “Mukalenge,” yèyè kwamba ne, “mpèèshè mufùbà wà mwongo byenzè bu citùpà cya mucì. Mpèèshèku dimanya dyàbúngì mu lusongo lwà musùkà wànyì. Ndekèlèku ndwishè dyabùlù mu ntàntà yònsò ùndìku ànu ne diinu nànsha dìmwe, ne pashiishe muncyànkùnnyè ne binyàngànyàngà too ne mungàáfwa.” Ndi ngèèla meeji ne aci’s cìmpè. . . Nènku aci’s ke cyàkènzàye ànu.

Aci's ke cyàkenzàye ànu; buludi, wìpacila ku bidimu lukàmà, ne mutungünùke ànu ne kuyiisha Èvànjeeliyò.

³⁵ Ntu ngumvwa bankòlomù bàà kale abu bàyiisha mùshindù awu. Dìngà ditùkù, kwenzekabi ne nkàngule kadyòmbà, ne mwanèètù mununu, dìnà dyèndè Mordecai F. Ham, wìpacila ku bidimu lukàmà lujimà, mucikàle ànu ùyiisha Èvànjeeliyò. Mémè kwamba ne: “Nzambì, mubènèshèkù, ne swàkù bwà ikale ne mìtootò ku cifulu cyèndè cyà butumbi piikalàye mwà kufika Kwàka.” Mwanèètù Ham, ncyèna mumumanye bìmpè menemene to. Dìmwè dyà ku matùkù aa ndi muswè ngátwilangana nendè kumpàla kwà kusabukayè kuya dyàmwàmwa, mu Buloba abu. Nènku, dìbà adi, yèyè ùdi mwà kulabulangana ku cyanza ne bantu bààbùngì Kuntwaku. Ndi mumanye ne yèyè neikalè ne bààbùngì bàà kulabulangana naabò ku cyanza pààfikàye Kwàka, kaa, bwalu yèyè ùvwa nkolomu wa kale.

³⁶ Mukalenge ànùbènèshè mpindyewu. Nènku mpindyewu, kumpàla kwà twètù kubwela mu Dìyì edi, tùlombe Mwenadi bwà kulwayè kutùbuulwilaDi.

³⁷ Taatù wetù wa mu Dyulu wa musàngèelu, tudi tuseemena Kùdi, dilòlò edi, mu Dìnà dyà kunanga, dyà butumbì dyà Mwàn'Èbè, Yesù; biikàle tutonda mpèkaatù yètù, ne katwèna bakùmbànyine kwakula Dìnà Dyèndè dyà cijila to. Bwalu mu . . . Dìkù dyònsò dyà mu Dyulu ndinyika dìnà ne “Yesù.” Dìkù dyònsò pa buloba ndinyika dìnà ne “Yesù.” Ne mu Dìnà adi cinù cyònsò necitwe paanshì, ne ludimì lwònsò nelùDijìkulè, nànsha biikàle bangènzàmpèkàatù anyì bansantu. Dìbà adi, patùdi twakula mu Dìnà Dyèndè, mùvwabi bikèngela bwà twètù kuzakala mu myoyi yètù, ne kaneemu kààbùngì, patùdi twakula apu. Pa nànkù tudi tulumba mu Dìnà Dyèndè, ne kaneemu kònsò, bwà Ùlwekù kutùdi dilòlò edi, Mukalenge.

³⁸ Tudi mwab'ewu munkaci mwà cimenga cinène, ciikàle ne mìshindù yònsò yà bintu bìdi Sàtaanà muswike naabi bantu, mu midimu yàbò yà dyenza, mu ditwà dyà twartà twà mfranga, ne bundumba, wiskì, ne mfwankà. Nènku, Èyi Nzambi, ne bambi bààbùngì, mu cyambilu, bàcilekèlèku ànu cipita bu ne cìvwa ànu cìmwè cyà ku bintu byètù byà patupù ebi.

³⁹ Kàdi, Nzambi, tùpèeshèku dìyì dyà didimwija, bwà twamònakù mwà kuyiisha Èvànjeeliyò mululàme ne mulelèlà, kutèeka cisuuyi kwinshì kwà mucì, kulekela bipàtu bìkapòna kwònsò kùdìbi mwà kupòna aku. Kàdi tükwàcishèku, Mukalenge, bwà kushìndumuna cilumbulwidi pa bintu byà mùshindù awu, ne kuyiisha Èvànjeeliyò wa Mwàn'Èbè munanga, Yesù awu.

⁴⁰ Nzambi, enzàku bwà cintu kampànda kwenzekaci cìikalà mwà kunyungisha cimenga eci bwà Bukalenge bwà Nzambi. Bwà ne, nànsha maèkèleeziyà, àdi maashila mu masangu à njila amu, miikalè ne bidimba bikesè, Èyi Nzambi, swàkù

bwà èkèleeziyà ayi yùlè ne yìpatè ne bantu bîmpè, bàà cyena-kale, bàà cijila abu, balediibwe cyàkàbìdì. Enzàku nàнку, Mukalenge. Nènku swàkù bwà tùpetèku ditàbuluja, ditàbuluja dyà cyena-kale, ditùma kùdì Nzambi diikala ànu mwà kunyukusha ku luseke lwà cimenga ne lukwàbò, dyumusha lwonji lwònsò. Éyi Nzambi wa yààya, kùtùpèeshikù disangisha dyà dileepàkànàngàne to. Tupèeshèkù ditàbuluja dyàkangà binwinyì byà maala, ne dyàlongolola maalu; ne kwenza bwà bantu kulwàbò, pàdì ngonga wa èkèleeziyà ùdila, ne bakungwila ku cyoshelu basambila kumpàla kwà diyiisha dyà mpaasàtà, ne badilongolola. Nzambi, enzàku nàнку's.

⁴¹ Mpindyewu, dilòlòlò edi, kùdì mwà kwikala babèèdì kaaba aka, Taatù. Nènku patùcìdì twakula pa babèèdì apa, anyì bwà babèèdì, kàbìdì, swàkù bwà Nyumà Mwîmpè òndopèku mubèèdì yònsò udi mu nzùbu emu awu. Sungilàku ngènzàmpèkàatù yònsò. Alujàku, kumbèlù, muntu yònsò mutwè cimpìngà kumuusha mu njila wendè wa dipàmbuka awu.

⁴² Nènku mpindyewu swàkù bwà Nyumà Mwîmpè ikalè Ewu udi mundombòle ku cyena-bwalu eci, dilòlòlò edi. Nènku swàkù bwà Yèyè àngatè bintu byà Nzambi ne àkwatè ànu mudimu ne musadidi Wendè ewu bu cyamù cyà mudimu, bwà Nzambi àngatè butùmbi. Bwalu tudi tulòmba nùнку mu Dìnà Dyèndè. Amen.

⁴³ Mu mvensà wa 7 wa nshapità wa 20 wa—wa Nombà, tudi tubala nùнку.

Nènku MUKALENGÈ wàkaakula ne Mòsà, wàmba ne:

Angata dikombo, ne sangisha disangisha pàmwè, wèwè, ne Aalònà mwanèènu, . . . akùla ne lubwebwe kumpàla mu mèsù àbò; nènku lwòlù nelùpatulè mâyi àalù, . . .

⁴⁴ Ndi muswè bwà nùmonè ne, mâyi “Àalù” awu.

. . . nelùpatule mâyi Àalù, ne wèwè neùbàpàtwile mâyi mu lubwebwe alu: nàнку wèwè neùpeeshè disangisha adi ne nyama yàbò mâyi à kunwà.

Ke Mòsà kwangatayè dikombo adi kumpàlà kwà MUKALENGÈ, bu mwàkamutùminàye dîyi amu.

Ke Mòsà ne Aalònà kukùngwijabò disangisha pàmwè kumpàla kwà lubwebwe, ne yèyè kubàmbila ne: Tèelejàayi. . . nwènu bantòmbòji nwè; tudi ne cya kunùpàtwila mâyi mu lubwebwe elu anyi?

Ke Mòsà kwelayè cyanza cyèndè muulu, ne dikombo dyèndè adi kutuutayè lubwebwe misangu yìbìdì: ne mâyi kupàtukawù mabòdyòdyòke, ne disangisha kunwàdì, ne nyama yàbò kàbìdì.

⁴⁵ Mukalenge àngatèku ndambù wa Mèyi aa mpindyewu, patùdì twalukila ku cyena-bwalu cyètù cyà makèèlèlà dilòlòlò ne tulwa naaci ku cyòci eci, bu Nzambi mwà kwanyisha.

46 Nènku mpindyewu, ndi muswè bwà babèèdi bwònsò bàdi munda emu, dilòòlò edi . . . Mpindyewu, Billy kí mmwabànyekù twartà twà disambila leelù ewu to, bwalu ncìvwa mumwambilè bwà kutwàbanyayè to. Mémè ne: “Ndààku ànu cyanààna, Billy, ne wàmbile Mwanèètù Cauble. Nènku anji ndekelaaku ànu . . .”

47 Ndi nteeta cintu kampànda, bwà butùmbì bwà Nzambì. Ndi ànu ndòmba Nzambì bwà àtùkwàcishèku, bwà kutùpèèsha misùùkà mu Bukalenge; ne beena kwitabuuja bàakoleshà diitabuuja dyàbò, ne kubànda, nànsha mene kabàyi ne cintu cikwàbò nànsha cimwè to, nebàseemene ànu kumpàla kàdi kwamba ne: “Nzambì, ndi muKwitàbùùje, pa Díyi.” Kì cyòci aci. Ke mùshindù wà mbangilu, ne wà kumpàla ngwòwù awu, ne wà mutàmbe bwìmpè. Ncyà bushùwà. Kwàta Nzambì ku Díyi Dyèndè. Dìbà adi, pawìkalà kùyì mwà kwenza nàнку to, dìbà adi, mu bushùwà bwà bwalu, Nzambì ùdi ùtumamù bikwàbò bintu, bu mùdi mapà ne bimanyinu, bwà—bwà kushindika Díyi Dyèndè, bwà kuDìshìndikila mwena kwitabuuja yònsò.

Mpindyewu, mu dyàlumingu, tuvwa ne: “bupikudi ku Mashi.”

48 Tudi twangata Izàlèèlà mpindyewu, mu lwendu lwàbò, bàpàtuka mu Èjiipitù, cifwanyikijilu cyà buloba, mu njila batàngile ku Pàlèstinà, buloba bulaya abu. Ngèèla meeji ne ncintu cilenga be. Mémè ndi ànu mucinangè. Pabwìpi menemene ne lumingu lwònsò elu, ndi nsòmba paanshì mbala Mukànda wà Ekèsòòdè mujimà awu, mémè ne mùshindù, anyi mwànyì pàanyì mwònsò mùndì mwà kufùdisha amu. Ndi mucinange bwalu ncimfwànyì cipwàngàne cyà èkèleeziyà leelù ewu, ngiikàdilù awu, ne mùshindù ùdi Nzambì ùkwàta mudimu. KutentemukaYe dìbà adi, cyàkenzàYe mu mubidi musangu awu aci, Yèyè ùdi munkaci mwà kwenza mu nyumà mpindyewu. Nwacyùmùvù anyi?

49 Mpindyewu, ki Yèyè awu wàkalombola Izàlèèlà, mu mubidi, mwaba wàkamònàbo, kutàngila, kubàpàtula mu buloba kampànda kubàbweja mu buloba bukwàbò bwà mu mubidi emu.

50 Mpindyewu tudi basàkiibwe kùdi Nyumà Mwìmpè, mu kubwela mpindyewu mu Buloba bulaya. Nudi nwitabuuja ne tudi mu njila batàngile ku Buloba bulaya anyi? [Disangisha didi dyàmba ne: “Amen.”—Muf.] “Mu nzùbu wa Taatù Wanyì mùdi bisòmbedi byàbùngì. Bu kabiyì nàнку to, nùнку’s ndi munwàmbile. Nènye kanùlongolwela mwaba.” Ncyà bushùwà anyi? [“Amen.”] Mpindyewu tudi ne Buloba bulaya kutùyaaya, ne ditùkù dyònsò didi dìleeja dibwe dyà cishimikidi cyà ntàntà wa kilòmèètà; ditùkù dikwàbò, dikwàbò dibwe dyà cishimikidi cyà kilòmèètà.

51 Nènku kùdi mundidìmbì munène mufiike mutèèka lwà kumpàla kwètù eku, ùbikidiiibwa ne lufù. Ne musangu wònsò wùdi mwoyi wètù wùtuuta, tudi twenda tuseemena pabwìpi ne

cyôci aci. Dimwe dyà ku matùkù àdì panshi aa, newikalè mwà kutuuta bwà musangu wàwù wà ndekeelu, nènku netubwelemu. Ndi muswè kwikala pa díbà dyànyì, kwenza cyànyì pàànyì citùpa; mûndì ntèkemena ne muntu ne muntu wa kunùdì ùdì wènza, dilòòlò edi. Pàndì mumanyè ne nci tèeka ànu kumpàlà kwànyì eku, ne bikèngela ntwilanganà naaci, ncyèna muswè kwikala muntu mutulùmùke to. Ndi muswè kudijìngila mu mùzàbì wà bwakànè Bwèndè, kubwelamù, mumanyè nùnku ne, ndi mutwishìibwe ne ndi muMumanyè mu Bukolè bwà dibìikà Dyèndè dyà ku lufù. Ncyà bushùwà. Aci, pàdiYe ubiìkila munkaci mwà bafwè, Nèmbiìkidiibwe bwà kupàtuka ne aba bàdì ne mwoyi. Nzambi ùdì Nzambi wa bàdì ne mwoyi.

⁵² Mpindyewu, pààkenzàbo lwendu mu buloba ebu, tudi tujandula ne Nzambi wàkenza—wàkabènzela ndongamu kampànda. Wàkatwàla bupikudi, ku mashi. Pashiishe tudi tujandula ne, Yèyè ùdì ùtwàla bupikudi, cyàkàbidì, ku bukolè.

⁵³ Tudi basangàne, dilòòlò dyà dyàbwàbwa adi ne, Yèyè wàkalaabisha mashi; ciwà ciikàle cifwànyikijilu cilenga cyà mwena kwitabuujà aci, cyà ne, pàdiye mwitàbe lufù lwà Kilistò pa kaaba kèndè, díbà adi ùdì ùlwa mwànà wa Nzambi. Ùdì ùbanga lwendu lwèndè.

⁵⁴ Mpindyewu, cintu cìdì cìlonà cìdì cìkèngelà kwikalayè naaci . . . paanyimà pàà yèyè mumanè kusungidiibwa, mu nyumà.

⁵⁵ Mpindyewu, lufù lwà mwànà wa mùkòòkò uvwa kàyì mwenzè bwalu awu lwàkalongolola mwoyi bwà mwena kwitabuujà mupiiile. Aci kí ncifwànyikijilu cipwàngàne mpindyewu anyì? Lufù lwà Muntu wùdì kàyì mwenzè bwalu, lùlongolola Mwoyi bwà mupiiile. Nènku lufù lwà Kilistò udi kàyì mwenzè bwalu ndulongòlòle Mwoyi bwètù twètù bapiiile.

⁵⁶ Mpindyewu, dyàmbedi, pashiishe, paanyimà pàà Nzambi mumanè kubàpèèsha mwoyi ku mashi, ne muwùjaadike ne, lufù lwàkàpicila pamutù pààbò, Wàkaasa naabo lwendu. Netùbangàtùlùle paanyimà pàà katanè.

⁵⁷ Mpindyewu mōnaayi ne, pashiishe, cintu ciwà cìlonà cyàkenzà Nzambi, mbenzè ànu ne bàshàadi beena kwitabuujà ne bânà balela anyì, ne biitàbe Nzambi, mwena lukunà wa lufù lwà mubidi awu kudimbatangana naabò. Kàdi kubàcìncimikila mu ditumba, kuntwaku mene; elu luseke cipèèlà; Mbù Mukunze ku lukwàbò; mikùnà ku luseke lukwàbò; Cilwilu cyà Pàlò eku cyènda cìlwa cìbàdiimbate, mìlìyò yà bàsàlaayi yìlwa mitwè ngendu yà mindòlòlooci, bwà kubàcimuna.

⁵⁸ Mpindyewu, Nzambi ùkaavwa mumwènèshe ne Yèyè nguvwa mubàpe mwoyi, ku lufù lwà mwànà wa mùkòòkò; mpindyewu Yèyè neàbàleejè bupikudi bwà mubidi. Àlèluuyàh! Nwamònu's, byònsò bibidì bwà lupàndu ne dyondopa, nwamònu's, bwà muntu wa mubidi ne muntu wa nyumà.

59 Mwanjèlò wa lufù kupitayè, kushindikayè ne Nzambì uvwa mwenze njila wa dipàndukila, ku mulàmbù wà mashi, ne bwôbò bààkaciitaba. Mpindyewu Yèyè neenzè njila wa dipàndukila ku lufù lwà mubidi.

60 Bu mùdi mwena kwitabuuja, pàdiye ànu ne wàsungidiibu. Pàmwäpa kànsèrè kampàndà kàkaadi kamudyè, anyi disaamà kampànda. Nzambì ùdi ne bupikudi, kàbidi, ku bukole. Byà mwomùmwe ne mùdiYe ne bupikudi bwà musùukà, Yèyè ùdi ne bupikudi bwà mubidi. Cìvwa . . .

61 Bävwa basungidiibwe, ne batengudiibwe. Bävwa mwinshi mwà mashi, kàdi, nànsha nànkù, Pàlò ùvwa ùya . . . Mwena lukunà ùvwa ne cyà kubàbütula, ùbàshipa bwònsò ànu mu cipèelà amu, dībà adi Nzambì wàkaleeja bukole Bwendè bwà bupikudi bwà mubidi wàbò. Nwacyūmvù anyi? Nudi bamanyè cīndi ngamba aci anyi? [Disangisha dīdi dyamba ne: “Amen.”—Muf.] Bupikudi ku bukole! Nènku dībà adi, pàkaavwà ànu mulwishi wamba kubàkwàta, Dikunji dyà Kapyà ditàmbe-mfùkulu adi kujuukadi kumutù kwà Izàlèlèlè aku, kubwikidijadi mwab’ewu ne kwimana pankaci pààbò ne lufù.

62 Lekèlaayi cinūbwelè munda mwà ndambù wa tusunsa. Nudikù mwà kumòna cīndi ngamba aci anyi? [Disangisha dīdi dyamba ne: “Amen.”—Muf.]

63 Mpindyewu, kùdi mwena kwitabuuja yònsò, mwànà wa Nzambì mulediibwe cyàkàbidi, pàdi lufù lùlwa lwibila ku ciibi, dībà kadiyi dyanji kukumbana to, Mwanjèlò wa Nzambì mmwimane pankaci pèèbè ne disaamà adi. Mpindyewu, wèwè muswè kukùya lubilu, abu’s bùdi ànu mbwèbè; kàdi kwena mwenzèjiiibwe to. Nwamònu anyi? Yèyè mmwimàne pankaci pèèbè ne lufù.

64 Kùkaadi bidimu makumi àbidi ne bisàtù, mu Lùpitaadi lwà beena Yuda, Ngàngàbukà Morris Fletcher kumpà mèbà àsàtù; umwe wa ku bangàngàbuka bapandyanganyi bàà mu cimenga emu, kumpaye mèbà àsàtù bwà kwikala ne mwoyi. S’mmémè emu ne mwoyi, dilòlò edi. Àlèluuyàh! Bwà cinyi? Ku ngàsà ùndi ncīyi mukumbànyine to, Mwanjèlò wa Nzambì wàkiimana pankaci pàànyì ne lufù, bwà kunkùba, ne mémè kuCìitaba. Nènku mu disàkidila, ku ngàsà wa Nzambì, ndi muMupetèle citùpà cyà mùliyò wà misùukà, dilòlò edi.

65 Kaa, mùshindù mwinè wùdi Nzambì mumanyè mwà kwenza maalu, bu twètù ànu mwà kulonda. Kùteeci bwà kulombola Nzambì to. Lekèlè Nzambì àkulombòlè. Nwamònu anyi? Twètù mbàdi ne cyà kulombodiibwa. Ngèèla meeji ne ki bwà cinyi Nzambì mmutùfwànyikije ne mikòòkò.

66 Kacya nukààdikù bamòne mùkòòkò mujimìne anyi? Mòna’s, wòwu’s ke ùdi mutàmbe kwikala wà mupange dyambulwisha pa buloba. Kawèna mwà kupeta njila wawù mwaba nànsha wùmwe to. Ùdi ànu kacya wìmana ne ùdila too ne mùdi mubwàbwà

ùwùdya, anyì ùfwila mwaba awu. Kawênà mwà kudipetela njila wa dyalukidila to.

67 Nènku ki mùshindù ngwôwò awu, wùdi, pàdi muntu mujimine, yéye kèna ne pabwàsà to. Kakwèna cintu nànsha címwe cyùdi mwà kwenza pa bwalu abu to. Nzambi, ku ngàsà, bìkèngela bwà àkulombòlè kùdi Kilistò. Yesù wàkamba ne: “Muntu nànsha umwe kèna mwà kulwa kùNdi to, pàdi Taatù kàyì mumukòke to. Ne yònsò udiYè ùkòka, ne ùlwa, Mèmè nèmupèeshè Mwoyi wà kashidi.” Mulayi kaayipu’s wè!

68 Kaa, mvwa kujinga ne muntu yònsò kaaba aka, címubwela ne mwinshi mwà lubadi lwitaanù ku dyàbakàjì eku, too ne mwàlengaci mujilu munène wà mwoyi. Udi mufwànyine kumòna ànu bantu bàjuuka, ne mäsàamà à mishindù yònsò mabàlembèlèle pambidi, bàpàtuka mu nzùbu emu, bènda bàcyònkómoka, bàbènga bwà kwikala naawù. Bikalàbà bìvwa mwà kwenda ànu mùdi bantu bwònsò amu’s. Bàvwa mwà kubènga kumanya cintu cikwàbò kanà cyònsò. Nwamònu anyì?

69 Udi ne bwôwà. Udi ne bwôwà bwà kutwàdija. Udi mwindile bwà Nzambi àpwekè àkukòke. Nzambi kàtu ùcyènza mùshindù awu to. Wèwè ngudi ne cyà kwela cidya. Yéye ùdi ùfila mulayi, wàmba ne: “Lwàyaayi,” díbà adi udi ulonda’s.

70 Mpindyewu mònaayi bàna bàà Izalèlèlè, díbà adi. Nzambi wàkalwa ne kwimana pankaci pààbò ne njiwù; bukolè bwà bupikudi...bupikudi ku bukolè, èyowà’s wè. Bupikudi ku mashi; bupikudi ku bukolè.

71 Makèlèlè dilòlò tuvwa babàshiye, munkaci ànu mwà kukalaba ku mwelelu wà màyi, luseke lukwàbò lwà Mbù Mukunze alu. Beena lukuna bwònsò, nkàtà yàbò yà màkalù à mvità yivwa myumùshìibwe. Tubalù twàbò kukwàcika bwôwa, ànu munkacinkaci mwà musùlù amu, kàdi ke kubangabò kunyùnguluka bu bàdi ku mwishi, bààya eku nùnkù, ne nkàtà mijaame mu bitoci ne mitùùke. Kàdi musùmbà wà bantu kukùtula lubilu bu babùlùke, mulwishi awu’s. Ke Izalèlèlè kubànda ku mwelelu wà màyi aku, bwà kumòna Nzambi òlola cyanza Cyèndè ne ùbutula beena lukuna bwònsò.

72 Cifwànyikijilu cilenga, cyà mwena kwitabuuja, mwinshì mwà Mashi; mwondòpiibwe díbà adi ku butwàngaji, bwà bukolè bwà Nzambi munkaci mwà kusingila mwoyi wèndè, kuwùleepesha bwà cikondo kampànda. Bàvwa kwikala, muntu ne muntu, mushipeela ànu mwaba awu mene; ùvwa kwikala mubavingutwile ànu mu cipèèlè amu mene, bu Nzambi kàyì mwimàne pankaci pààbò apu. Nùnkù’s ndi mufwè, kukaadi ntàntà mule, bu Nzambi kàyì mwimàne pankaci pàànyì ne lufù to. Mwena kwitabuuja yònsò mwab’ewu nùnkù’s mmufwè, kukaadi ntàntà mule, bu Nzambi kàyì mwimàne pankaci pèèbè ne lufù to; yònsò wa kunùdi. Pa nànkù, Nzambi, mu ngàsà

Wendè mudishikàmìne ne luse, mmwimàne pankaci pàà mwena kwitabuuja ne lufù. Àlèluuyàh!

⁷³ S'ki cyôci eci. Dîbà adi cintu cidi cilondà bwà mwena kwitabuuja ncinyi? Cintu cidi cilondà ndibàtiiza dyà Nyumà Mwîmpè dîbà adi. Mòsà wàkalombola bânà bàà Izàlèèlà too ne ku Mbû Mukünze, bàakabàtijiibwa mu Mbû Mukünze. Mbû, mâyi, bileeja Nyumà. Pààkatuutaye Lubwebwe, mâyi àkapàtuka. Nènku cìvwa cìfwanyikijilu cyà Kilistò, mu Yone 3:16. “Nzambi wàkatàmba kunanga bàà pa buloba, kufilaYè Mwan'Èndè umwèpelè mulela, bwà ewu yònsò wàmWitabuuja kafù to, kàdi ikalè ne Mwoyi wà kashidi.” Mònaayi ne, cisàmbà cìvwa munkaci mwà kubùtuka, mu cipèèlà, cyàkasungidiibwa ku Lubwebwe lutuuta. Ne cisàmbà cidi munkaci mwà kubùtuka ncisungidiibwe leelù ewu (cibùtuka mu mpèkaatù, cibùtuka mu bubì) bwalu Mwànà mutuuciiibwe wa Nzambi wàkangata kaaba kààbò; mâyi, Nyumà, munkaci mwà kutùnkumuka's!

⁷⁴ Tàngilàayi, ndi muswè nùcimònè mpindyewu, pàvwàbo bàpìcila mu Mbû Mukünze apu, cìvwa cìfwanyikijilu cyà kupeta Nyumà Mwîmpè. Paanyimà pàà mwena kwitabuuja mumanè kupikudiibwa ku lufù, muyè ku Mwoyi; bukòlè bwà Nzambi bwòndòpe mubidi wèndè; mpindyewu yèyè mmuntu mudìlongòlòle bwà dibàtiiza dyà Nyumà Mwîmpè. Mpindyewu yèyè ùdi ne lwendu, kuntu kwàka, kumpàlà kwèndè aku; kàdi, kumpàlà kwà yèyè kumòna mwà kutwilangana ne lwendu alu, bikèngela ikalè ne cintu kampànda bwà kumupicishilamù. Amen. Cìfwanyikijilu cipwàngane cyà Mpenta!

⁷⁵ Mònaayi, pàvwàbo bènda bàkalaba ku mwelelu wà mâyi apu; mwena kwitabuuja yònsò, paùdi ubwela ne usungidiibwa, witaba Mashi à Yesù, ucidi ànu mutungùnùke ne kukwàta ku *cikampànda* ne kukwàta ku *cikansanga*, ne kùyi mwà kulekela *cikampànda* ne kùyi mwà kulekela *cikansanga* aci to. Paanyimà pàà katanci, Nzambi ùdi mwà kukwenzela bintu bìmpè; kàdi nyàwù kùyi mwà kulekela mfwankà yèbè ayi to, bikèngela ùnweku tuumaala twà mu bantu ne bakwènù ku musangu ne ku musangu. Kàdi cidi cikukèngela kwenza nkupìcila mu Mbû Mukünze.

⁷⁶ Pààkapàtukàbo ku luseke lukwàbò alu (Ki cyôci eci, Ndi muswè nùcimònè.), pààkapàtukilàbo ku luseke lukwàbò apu, bàkalaba ku mwelelu wà mâyi ne bàtàngila paanyimà, ne kumònabo benzejanganyi bàà midimu mikòlè bàà kale bàakadi bàbàtuuta, bashipe bàmwè bàà ku bwòbò abu. Ànu bu mùdì kànsère ne mfwankà ne makànyà ne wiskì ne bikwàbò byònsò, bitombweshà bânà bakesè, bibàtuma mu nzùbu yà bapàle, mu mpitaadi, ne bitwàla musumbà wà bantu banyungulùke mitù ne bikwàbò byònsò pa buloba. Pààkeelabo mèsù paanyimà ne kumòna bintu byònsò abi bikèngakana, kabiyi dikwàcisha to, ne munkaci mwà kufwà mu mbù amu, mwanèètù, wèwè udi wakula bwà disangisha kampànda; bàvwa naadi's!

⁷⁷ Mòsà! Kaa, nêngànji kulekela eci citùkina mu ndòndò. Ndi ntèkemena ne cidi cipweka mu ndòndò. Mòsà, mupròfeta mutàmbe bunène ukaadiku ne mwoyi, pa kuumusha Yesù Kilistò. Kacya kakùvwakù muntu ukààdikù Nzambì mwakùle nendè, mwàkenzàYe ne Mòsà amu to, pa kuumusha Kilistò. Yèyè kwamba ne: “Kwòkò kampànda mwikàle wa nyumà, anyi mupròfeta, munkaci mwènù, Mémè némuleeje bikèènà-kumòna ne nènDìmanyishè kùdiye. Kàdi kî mmusadidi Wanyì Mòsà to; Ndi ngàakula nendè ku mishiku bibwela mu maci.” Ncyà bushùwà.

⁷⁸ Mòsà, muntu wa luumù ewu. Mmwenze ànu ujikija dilabula adi, kumònaye benzejanganyi bwònsò bàà midimu ku bukolè abu bafwè, kumanyayè ne bintu byònsò abi bìvwà biye bwà kashidi dîbà adi. Bintu byònsò byàkadi bibàkòòkeshe abi, ne bibàtuuta, ne bibeela mfimbù nseke yònsò, kwàbi kùvwà kujike. Kujuuulaye byanza byèndè muulu ne kwimbayè mu Nyumà. Kaa, ekèlekèlè!

⁷⁹ Kacya kacitukù cyànji kufwànyikijiibwa to, ne kacýadyakufwànyikijiibwaku to, too ne mutwàya mu Butùmbi mwàmwa. Pàakajikaku mwaba awu, wàkimba musambu mu Nyumà. Ne patùdi bapikula mu mubidi. . .

⁸⁰ Aci cìvwa cifwànyikijilu cyà Nyumà Mwîmpè ùlwa ku Mpenta, patwàkapiçilà mu mbù. Cìvwa ncifwànyikijilu cyà Mpenta. Nènku Mòsà, mu mubidi wà bwa- . . . mu cifwànyikijilu kale wàwa, pàakapicilàye mu cyòci aci, wàkimba musambu mu Nyumà. Cyàkalwa mu Ditùkù dyà Mpenta. Ne pàdi mubidi mupwàngàne, mupikula . . . Mpindyewu musùkà wètù mmupikùdìibwè mu bupwàngàne, bushùwà ne: “kawèna mwà kubùtuka to; ùdi ne Mwoyi wà kashidi.” Cidi Bible àamba aci’s!

⁸¹ Kaa, ndi ndyùmvwa bìmpè. Mònaayi ne mbwà cinyi. Bwalu ndi mumanyè ne cidi EMU MMÙDÌ MUKALENGE WÀMBA. Ndi ànu ngèlamù lwongo lwà musùkà wànyì, ntùngunuka ne lwendu, ngàmba ne: “Sàtaanà, ela nshibà yònsò yùdi muswè ayi, kùndi eku. Kayàkuntacishiku to, bwalu ndi mumanyè Ewu ùndi mwitàbùùje, ne ndi mutwishùbwe ne Yèyè ùdi ne bukolè bwà kulama cìndi muMupèeshe too ne ku Ditùkù adi.” Amen.

⁸² Cidi citùkèngelà dilòlò edi nditàbuluja dîmpè, dyà cyena-kale, dyà Billy Sunday, dicibulula, dyà àlèluuyàh, ke cidi citùkèngela mu Louisville mwònsò emu. Ncyà bushùwà, dijinga ne ditàbuluja dîmpè, dyà cyena-kale, dyà mpenta ditùma kùdi Nzambì. Èyowà’s, mukalenge.

⁸³ Mònaayi ne, dîbà adi, pàdi mibidi yètù yìpikudiibwa. . . Byòbi biine, tudi ne dyondopa dyà kùdi Nzambì mpindyewu, bu mundidimbi.

⁸⁴ Ànu mùvwa aci mundidimbi wà Mpenta kuntwaku, tàngilàayi cyàkenzàbo mu cikondo cyà mundidimbi, wà lupàndu. Tàngilàayi mwàkendàbo kumpalà kwà Nzambì ne:

“Bajime . . . lusongo ne pa nàнку . . . yà kapyà, ne bàpànduka ku lusongo lwà mwelè wà mvità,” bintu byònsò byàkenzàbo ebi, “kupàtukabò mu bikùtù byà kapyà; kule ne bwinà bwà ntambwe, ne bikwàbò byònsò,” ku mundidimbì, àlèluuyàh, ku mundidimbì wà Mpenta.

⁸⁵ Mpindyewu tudi ne bupikudi bupwàngàne ku Mashi à Kilstò. Kabàvwa mwà kupeta bupikudi bupwàngàne dībà adi to, bwalu civwa mwinshi mwà mashi à bimpàngà byà ngombe ne mbùji, nènku kacýàdyàkuumusha mpèkaatù to; cyàkabwikidija ànu mpèkaatù. Kàdi pààkeediibwà Mashi à Yesù paanshì, Mashi à matàmbe kwikala makàne à cijila awu, mpèkaatù kayivwa mibwikila kàbìdì to; yivwa mibènga ne mijikè, ne mwena kwitabuuja ùya mu Bwikadi bwà Mufùki wendè. Àlèluuyàh!

⁸⁶ Piikalàbi ne bààkenza nàнку dībà adi, mundidimbì awu kuntwaku, wà Mòsà mwikàle wimba misambu mu Nyumà; pashìishe, mu Bwàkabuulwibwà mwàmwa, aba bàdì ne bupikudi bupwàngàne bwà mubidi abu, bààkiimana pa mbù wa lumwenu awu ne kwimba cyàkàbìdì musambu wa Mòsà, lwà mu Mukàndà wà Bwàkabuulwibwà.

⁸⁷ Nwakula pèènu bwà di—disangisha dyà mu Nyumà Mwìmpè anyì? Bàvwa naadi pààkajuukilàbo kuulu ku mwelelu wà màyi aku. Tèelejà, mwanèètù wa bakàji. Miliyàmà mwànà wa lumù awu, mupròfetà mukàji awu, mwanààbò ne Mòsà wa bakàji awu, mupròfetà mukàji awu, wàkasaluka bikolè bitàmbe mu mùshindù wà ne wàkapyà ngoma wa mutumbi mu byanza kàdi kuvùkuta lubilu ùpweka ne mwelelu wà màyi awu, wènda wimba ngoma wa mutumbi awu, ne ùja maja mu Nyumà. Kì ng'ànu aci nkààyaci to, kàdi bánà bàà bakàji bwònsò bàà Izàlèlèlà bàvwa bàmulonda, bàja maja mu Nyumà. Aci cyòci kacýi Nyumà Mwìmpè munkaci mwà kupweka to, kacya ncitukù mwanji kumumòna nànsha. Mòna's, mu bushùwà bwà bwalu, bwòbò abu, matùnga wònsò à mishingà, à lumù awu àvwa mwà kwikala mapongwèle mu tulòndo twàbò twà mèsù àbìdì twà dimwèna atu ne kumòna cyòci aci, bàvwa bafwànyine kwamba ne: “Dikolesha dyà maalu.” Cyà bushùwà. Kàdi civwa n'Nzambì. Cyà bushùwà!

⁸⁸ Bintu byà lumù bìdì bìpwekesha mèsù, leelù ewu, pa cìdì Nzambì mubènèshe. Bushùwà's!

⁸⁹ Bìdì bìmvùlwija bwalu bulonda kampànda. Muntu kampànda wàkadi ne ferme munène mulenga wa dikèma. Wàkiibaka mayeebà manène malenga matàmbe, ànu à lumù ne à kapelu ne mwèndè mwònsò, kàdi ùvwa mupuuyile bikolè bwà kudìma. Eyo. Kwàkadi cidimè mukwàbò uvwa mudyàngane nendè mutumba; kàvwa ne diyèèbà diinè dyà ndoolù to, kàdi yèye ùvwa cidimè cyela mayeebà, ne kuujaye diyèèbà adi tètè ne byàkudyà bìmpè cidimu aci. Nènku kulediibwakù twànà twà ngombe túbìdì, kàmwè mu cikumbì cìmwè ne kàngà mu

cikwàbò. Pààkalwa muvù wa bintu bitòloka, kupàtulabo twànà twà ngombe at mu cikùmbi.

⁹⁰ Kànà kàà ngombe kàà emu aku, kàvwa kadiisha kadiishilamu, ekèlekèle, pàakatwàdija lupeepèlè alu kukàtuuta, kaa, ekèlekèle, kutuutakù tukònu muulu, ke kòkù kàyaaya kàka, ne lubilu lukolè ne mwàkù mwònsò; kàkoona mu dyùlu, katumpika, kènda kàtwa tukònu paanshi, kacya kàatungunuka.

⁹¹ Nènku pashiishe cidimè mu kwàbò kupàtula kèndè, lwà kuntwaku. Kakàvwa ne—kakàvwa ne kantu nànsha kàmwè kàà kudya to ànu bisoosa bibi; mwena lulèngù bwà kudima wa èyo, mupuuyile bwà kukàdiisha.

⁹² Cidi cìmvùlwija bàmwè bàà ku bampaasàtà aba. Cyà bushùwà! Cyà bushùwà! Bapuuyile bà dikèma's! Dilènguluja dyà maalu dipite. Kàdi ànu mayeèbà à lumù ke cyònsò cinùdi naaci. Tèekaayimù Cyàkudya bwà ngombe's! Cyà bushùwà. Cyà bushùwà. Dibàtiiza dyà Nyumà Mwìmpè, diyiishibwe ne bukolè, nedibòshè. Ncyà bushùwà. Kàdi's ke cidi cìbàkèngelà ncyòci aci, ndyoshiibwa kampànda dìmpè dyà cyena-kale; ke cidi cìkèngelà èkèleeziyà, ke cidi cìkèngelà bwà bidimba aci's. Mònaayi.

⁹³ Nènku kànà kàà ngombe kàà kale aka kàkaavwa kanyangakaja. Kakwàcìkwètù, kenzè ne luse aku kupàtukakù mu cikùmbi, kàvwa kanyànè bikolè kakàyi mùshindù wà kwenda to. Ki kupongwelakù mu mutanta, ne kutàngilakù dyàmwàmwa.

⁹⁴ Kàdi kumònakù kànà kàà ngombe kakwàbò aku ànu kamònàngàne ne kuvuma. Kàvwa ne maanyi mubidi mujimà. Kàvwa kadyùm vwa bìmpè. Kàvwa kadye mu muvù wònsò wà mashika amu.

⁹⁵ Ki kànà kàà ngombe kakesè, kàvwa kalàlèlaale ne nzala aku kukenzakanaku, kamba ne: “Dikolesha dyà maalu's wè!” Ekèlekèle! Bushùwà, kàvwa kanyànè kèèbè kàà dikèma kakàyi mwà kwela meeji ku cintu cikwàbò nànsha cìmwè to.

⁹⁶ Kàdi, cinwàmbidi, pàvwa kàà maanyi mubidi mujimà kuntwaku, mu muvù mujimà wà mashika amu, mwanèètù, kàvwa kamanyè pàvwa ku kiimànyine's. Kàvwa kàpìcila mu cikondo cyà dicyònkòmoka pàakabanga cipeepèlè cyà luuyà aci kukàtuuta.

⁹⁷ Ne muntu kanà yònsò udi mulediibwe kùdi Nyumà wa Nzambì ewu, nebàmubiikilè ne mmukoleshi wa maalu anyi ní ncinyi cikwàbò cyònsò. Kàdi pàdi luuyà, lwà mu muvù wà bintu bitòloka alu, lupeepèlè lwà Nyumà Mwìmpè lubanga kulwa mwàkenzàLu mu Ditùkù dyà Mpenta amu, cintu kampànda necyènzeke. Cyà bushùwà. Mpeepèlè yà luuyà mmibange kutuuta; mwanèètù, wèwè's udi ne maanyi mubidi mujimà à Èvànjeeliyò, makujingile ne munkaci mwà kudyùm vwa bìmpè. Juukilà kuulu kàdi ùpicile mu dicyònkòmoka's.

98 Mùshindù awu ke wàkenza Miliyàmà ne bakwàbò abu. Kupwekeshabo mèsù ne kumòna bintu byònsò byà kale byàkenzabo kale wàwa, bìvwa byònsò bifwè ne biyè mwamwamwa. Bàkaavwa bamanè kumòna Nzambi mwitàbe mashi; bamanè kumòna bukolè Bwendè mu dyondopa dyà kùdi Nzambi, bwimàne munkaci mwàbò; bàpicile mu Mbù Mukünze, ne babàtijiibwe ne Nyumà; bendè bayè dyàmwàmwa, bàpicile ànu mu cikondo cyà dicyònkómoka. Kabàvwa bàcyùka cìvwa . . . malongolodi wònsò èla meeji bwàci to. Amen.

99 Ncifwànyikijilu kaayi cipwàngàne cìdici leelù ewu's wè, cyà mwena kwitabuuja wadìdinga kupàtuka awu!

100 Nzambi wàkalaya ne Yèyè neàkumbaje dijinga dyàbò dyònsò. Yèyè wàkalaya ne neAkumbaje dijinga dyètù dyònsò. Yèyè kàakabàmbilakù ne: “Nèngènzè njila wa dyondopa; Nèngènzè njila wa *cikampànda*; Nèngènzè njila wa *cikansanga*” to. Yèyè wàkamba ne: “Nèngìikalè neenù!” Alèluuyàh!

101 Ki cyàkatwàmbilàYe ncyòci aci. “Nèngìikalè neenù, munda mwènù mene, too ne ku ndekeelu kwà buloba.” Ki cyònsò cìdici cikèngelà bwà mèmè kwamba ncyòci aci. Kabyèna bikèngela bwà wèwè kukòkangana pa *cikampànda*, *cikansanga*, anyi *cikankènga* to. Yèyè mwikàle kaaba aka, aci cìdici cinsànkisha; Dyondopa dyà kùdi Nzambi didi kaaba aka, Bukolè bùdi kaaba aka. Cyònsò cìvwaYe kuntwaku aci, ke cìdiciYe mpindyewu ne: “Yesù Kilistò umwèumwè awu makèèlèlè, leelù, too ne kashidi.” Pa nàнку, udi mwà kwangata tèòlòjì webè awu ne kudiina nendè mu màyi. Mwanèètù, ndi ngùitabuuja ne Yesù Kilistò ùdi umwèumwè awu makèèlèlè, leelù, too ne kashidi; wàkamba ne: “Nèngìikalè neenù, munda mwènù mene, too ne ku ndekeelu kwà buloba.” Èyowà's.

102 Ki bwòbò bàakapàtuka abu, ne Yèyè ùvwa naabò. Mpindyewu kwambayè . . . Kaa, bàvwa ne kàtungà kakesè kàà màmpà pamutù; wònsò kudiikawù ne kujika. Kabàvwa nànsha ne dimwè to. Kuyabò kalààla, biikàle ne nzala ndambù dilòòlò adi. Kàdi pàakacyàbu mu dindà pàakabìikàbo, kùvwa màmpà matèeka paanshi pwònsò apu.

103 Ke mùshindù awu ùdi Nzambi wènza maalu; ùkulekela utwà too ne ku cibùngùbùngù, pashiishe ùnùleeja cìdiciYe mwà kwenza pa bwalu abu. Ncyà bushùwà. Útu munangè kwenza nàнку. Útu munangè kwenza nàнку. Útu munangè kushitula bantu Bèndè.

104 Wèwè mulùme's utu muswè kwenzela mukàjèèbè mùshindù awu's. Windila too ne ku mufikilu wà dilediibwa dyèndè, umushiya ànu mu difwànyikija dyà maalu, bwalu's udi mumunangè.

105 Ki bwà cinyi Nzambi ùdi ùtùlekela tushìikila mîngà misangu, bwalu Yèyè mmutùnage ne muswè kushindika citàmbe-mfùkilu Cyèndè ne bukolè Bwendè. Bwalu Yèyè mmutùnage, ki bwà cinyi Yèyè ùdi ùcyenza. Èyowà. Údi ànu

ùtùlekela tukafika ànu ne mwaba utùdi ànu twamba kwela cidya cyà ndekeelu awu, dībā adi Ûdi ùmata mu cyalu.

106 Yèyè wàkalekela bānà bàà beena Ebèlù abu bābwela buludi mu cikùtù cyà kapyà, kàdi's kwàkadi Muntu mwināyī mwimāne mwaba awu ne cipeepudi, ùkùùmusha kùdìbo. Nwamònu anyi? Yèyè ùtu misangu yònsò ànukù. Kacya Kātu ùmuka to. Ùtu misangu yònsò ànu pabwipi. “Mwanjèlò wa Mukalenge ùtu wàsa citùùdilu kùdì aba bàdì bàMuciina.”

107 Mwaba awu, dilòòlò adi, kwambulabò dyāmpà adi pàākacyābu mu dindā. Ndi mwà kumòna beena Izālèèlà bāvwa bafūme ku dipicila mu Mbù Mukunze abu; bafūme ku dipikudiibwa ku mashi; bamòne Bukolè bwondopi bwà Nzambi, anyi Bukolè bwà bishimā bwimāne pankaci pàà Nzambi. . . ne pankaci pàà Izālèèlà ne Èjiipitù; ne bwinyije balwishi paanyimā apu.

108 Bu mùdì kànsèrè kàà kale aku kayè kashidi, bufofo buyè, bumpudimaci buyè, disaamā dyà nsùkaadi adi diyè, byònsò bimanà kutùkijibwa mwinshi mwà Mashi à Yesù Kilistò mwāmwa. Udi udyùmva munyi? Ekèlekèle!

109 Paùdì wenda upweka ne mùsèsù, ne mudyudi kampānda wa kale wāmba ne: “Mpindyewu anji indila kakesè! Udi mutwishibwe bwà bwalu abu anyi?”

“Kwàkulu naanyi to.” Amen. Kaa, ekèlekèle!

110 Ndi mwà kubāmòna pambèlù pàāpa, badikungwije ànu kudikungwija, bamònāngāne ne kudyà, ne bāpicila mu cikondo cyà dicyònkómoka. Byenzè ànu mùdì disangisha dyà cyena-kale, dyà mu Nyumà Mwimpè's. Ke Nyumà wa Nzambi udi upwekela munsantu kampānda mukèsè, òlola cyanza; ùbwela mu mwoyi mùshindù ewu, ne wèla lubilā ne: “Mukalenge àtumbè's wè!” Ànu disangisha dyà cyena-kale mùshindù awu. Èyowà's, mukalenge. Bāvwa ànu bācyāngacila ku elu luseke ne ku lukwàbò, bāpicila mu cikondo cyà dicyònkómoka.

111 Mpindyewu, dyāmpà adi kadyākajikakù to. Dyākatungunuka mu lwendu lwònsò amu, bwàbò bōbò. Ncyà bushùwà. Ne cívwa cífwan'yikijilu cipwāngane cyà Mpenta munda mwètù. Aci's cívwa mmu mubidi. Dyāmpà adi kadyākajikakù to. Dyākashààla ànu dyāmpà dimwèdimwè adi, too ne pàākabwelābo mu buloba bulaya. Ncyà bushùwà anyi? Nwènù babadi bàà Bible nudi bacimanyè. Ne pashiiše patùdì. . .

112 Èkèleeziyà wākabanjjiibwa mu Ditùkù dyà Mpenta, pāvwa beena kwitabuujā bāsanganyibwa kuulu aku apu. “Ke kulwakù cyonā cyenzè bu cipeepèlè cicolè cyà cívuma, kuujaci mu nzùbu mùvwābo basòmbèle amu.” Nyumà Mwimpè umweumwe wākamata musangu awu, ùdi ùmata mpindyewu. Neātungunukè kuumukila ànu ku cikondo aci too ne ku ndekeelu kwà cikondo.

Neàtúngunukè ànu ne kuya. Ndyâmpà dyètù. Bààkadiishiibwa ne dyâmpà dyà mubidi; tudi tudiishiibwa ne dyâmpà dyà nyumà.

113 Yesù wàkamba ne: “Mémè ndi Dyâmpà dyà Mwoyi didi difùme kùdì Nzambi, mu Dyulu.”

114 Bwôbò kwamba ne: “Baataatù bèètù bààkadyà manà mu cipèèlà, mu cipòòlù cyà bidimu makumi ànaayi.”

Yèyè kwamba ne: “Bwôbò abu, muntu ne muntu, s’mbafwè.” Èyowà’s, mukalenge.

115 “Kàdi ewu udi udyà mubidi Wànyì ne ùnwa Mashi Àànyì, ùdi ne Mwoyi wà kashidi, ne Mémè némubiishè ku lufù ku matùkù à ndekeelu. Mémè ndi Dyâmpà dyà Mwoyi didi difùme kùdì Nzambi, mu Dyulu. Muntu yèyè mudyè Dyâmpà edi, kààdyàkufwàku to.” Ki bwalu mbwòbù abu’s. Bàvwa ne dyà mu mubidi; twètù tudi ne dyà nyumà. Kaa, mémè ncyèna mufwànyine kucishintakaja ne kantu nànsha kàmwè to. Bilenga be!

116 “Kaa,” múdi wamba, “Mwanèètù Branham, twètù bwònsò’s tudi bamanyè ne wèwè udi mukoleshi wa maalu.” Èè, s’ndi mumanyè, mémè pàànyì. Mémè ndi mubùlùke bwà Kilistò. Wèwè udi mubùlùke bwà nganyi? Udi mwà kwikala mubùlùke wa dyabùlù. Èyo. Nànku, mbipiciibwe ne mémè mwikàle mubùlùke bwà Kilistò, kí mmwòmò anyi? Èyo.

117 Mònaayi, cikwàbò cintu ncyôci eci pa bwalu bwà manà awu. Pààkabangàbo kuàlabula, bààkamba ne: “Àdi ne mwenya wà bwíci.” Èyowà’s, àvwa mashème. Ndi ànu mwà kumòna bansantu bàà kale abu bàlàka ku mishiku bamònàngàne ne kuàdya kufitula. Àvwa mimpè.

118 Nukàadikù balabùle *Eci* anyi? *Eci* ncímpè, pààci. Yèyè kwamba ne: “Labùlà ne ùmonè ne, Mukalenge mmwimpè. Cìdi ne mwenya wà bwíci mu lubwebwe.” Ntu misangu yàbúngì ànu ngamba diyì edi, misangu yàbúngì. Bwà ne, pàvwà Davidì wa kale awu, wàkamba cyôci aci mu Musambu wèndè awu, wàkamba ne: “Cìdi ne mwenya bu wà bwíci mu lubwebwe.”

119 Davidì, bu múvwàye mulami wa mikòòkò, ùvwa ne kasàpu kakesè kàa ku dyàpà, ùvwa mukàpàye ku dyàpà dyèndè, ne bàtu misangu yònsò ànu bàmbwilamù bwíci. Balami bàà mikòòkò bàà kale abu bàtu bàmbwilamù bwíci, kàbidì, mu—mu Pàlèstinà. Ne pàdì mikòòkò yàbò—yàbò yidì yisaama ayi yènda yiya, pashiishe, katanci aka anyi, ùdi wòlola cyanza ne wàngata ndambù mukesè wa bwíci ebu, ne ùbwàngata ùbùlaabakaja pa lubwebwe, lubwebwe lwà lwenze bu lupembà. Nènku mikòòkò mminangè bwíci abu, nènku ùdi ùditwa mu kulàka bwíci abu pa lubwebwe apu. Ne kùdi cintu kampànda pa bidì bitàngilà lubwebwe lwà bu lupembà lùdi lwòndopà mikòòkò yidì yisaamà.

120 Nènku ndi nzwambila ne, tudi ne nsàpu mujimà wa ku dyàpà mùle tètè ne bwíci kaaba aka dilòòlò edi, nènku netùbùtèèke

pa Lubwebwe, Kilistò Yesù. Nènku mùkòòkò ùdi ùsaamà awu ùditwa mu dilàka, udi mutwishìibwe bwà kuumvwa bímpè. Ncyà bushùwà, ànu ùlàka, ùlàka, ùlàka. Nènku pàdiwu ùlàka bwíci apu, mòna's, udi mutwishìibwe bwà kupetakù ndambù wa lupembà alu. Aci's ncilelèlè ànu mùdi cintu kanà cyònsò eci. Mpindyewu, katwàdyàkubùtèeka pa èkèleeziyà to. Netùbùtèèkè pa Kilistò, mwaba wùdi mubùkùmbànyine. Ncyà bushùwà. Bwalu, dyondopiibwa dìdi dyà mu Kilistò, amen, bu mùdi dìbènesha dikwàbò dyònsò dyà bupikudi. Mònaayi.

¹²¹ Nènku cikwàbò cintu. Pààkabanga aci kumata, Aalònà wàkapeta cikèmu bwà kupàtuka ne kupeta bisakà byàwù byàbùngì.

¹²² Mpindyewu, bu bwòbò batèète bwà kulama ndambù bwà ditùkù diibìdì, àvwa ànyanguka. Nènku aci's ncitàmbe bùngì munkaci mwà bantu bàà Nyumà Mwímpè dilòòlò edi. Udi uteeta kudyambidila ne: “Èè, kùkaadi bidimu makumi àbidì, tuvwa ne diyiiisha dímpè. Tuvwa ne—tuvwa ne cikondo cilenga.” Cyùdi naaci dilòòlò edi ncinyi? Ki cintu ncyòci aci. Bwòbò. . .

¹²³ Àvwa àmata dilòòlò dyònsò. Kacya kaàtukù mapangike musangu nànsha wùmwè to, pa kuumusha ànu dyà—dyà Nsabatu. Ncyà bushùwà. Nènku mpindyewu Nzambì nguvwa muàmacishe, mapyamàpyà, dilòòlò dyònsò; ditùkù dyònsò, dîbà dyònsò, àvwa àlwa.

¹²⁴ Mònaayi, bisakà byùle abi bìvwa bilama aku. Yèyè kwamba ne: “Mpindyewu, tàngilàayi, panwàbwelà mu buloba abu, ne bàna bèènù bàbanga kukonka bwà cyòci eci. . .” Yèyè kwamba ne: “Mwakwidi yònsò mpindyewu udi ubwela mu bwakwidi awu, paanyimà pàà yèyè mumanè kupeta dyanyisha dyà kulwa mu mwaba wà Cijila awu, ne bikwàbò, ne mujidiibwe, mwakwidi, dîbà adi ùvwa ne bukenji bwà kubwelamù ne ùdyakù ditàma ntèntè dyà manà à ku cibangidilu àkamatà ku cibangidilu awu.” À kumpàla menemene àkamatà awu, bààkaàngula ne kuàtèeka mu cisakà, ne kuàlamabò, nènku àvwa ànu malamina bwà bwakwidi.

¹²⁵ Mpindyewu wèwè udi wamba ne: “Mwanèètù Branham, aci cìdi cimfwànyì cyà cinyì leelù ewu?”

¹²⁶ Mòna's, twètù's tudi bwakwidi. “Nwènù nudi bwakwidi bwà bukalenge, ditùngà dyà cijila, cisàmbà cyà pabwàcì, nufila milàmbù yà nyumà kùdi Nzambì, mamuma à mishikù yènù yidì yisàkidila Dìna Dyèndè.” Amen. Ki cyòci aci's. Mpindyewu, dîbà adi, mu Ditùkù dyà Mpenta, pàvwa Nyumà Mwímpè munkaci mwà kupweka; ètù manà's.

¹²⁷ Mpindyewu, mwakwidi yònsò udi paanyimà pààpa wàwa, mu Dipungila Dikùlukulu, pààvwa yè ùbwela bwà kwikalayè mwakwidi, ùvwa mumanyè ne ùvwa ne cyà kudyà ditàma ntèntè dyà manà à ku cibangidilu; kí ncintu kampànda cyà cikwàtakaja to, cintu kampànda cikwàtakaja kùdi bantu cyà cifwànàngàne

naawù to. Kàdi ùvwa ne cyà kupeta ndambu wa à ku cibangidilu awu.

¹²⁸ Èè, mu Ditùkù dyà Mpenta, pààkabangà ètù manà kumata, Nyumà Mwimpè wàkalwa bu cipeepèlè cicolè cyà civuma. Kì musùmbà wà bantu bakesè, bàà kuneemekiibwa, lukàmà ne makùmi àbìdì, mu cibambalu cyà kuulu; biibi bikànga, màdidiishì mapwekesha, basòmbe paanyimà apu, bindile mulayi. Èyowà, bàvwa ne Yesù, bushùwà. Bàvwa bamanyè bukolè Bwèndè, ne byònsò abi, kàdi bàvwa bindile mulayi awu.

¹²⁹ Kì citùdì baswè dilòòlò edi ncyòci aci. Bwà kwikala . . . Bu kasùmbù kàà bantu aka mwà kupetangana ne díyì òmwè, bu mwàkadìbu mu dilòòlò adi, cintu cìmwècìmwè aci's ncifwànyìne kwenzekelula dilòòlò edi, kaaba aka mene mu nzùbu emu, mu Louisville, mu Kentucky, cyàkenzuluka mu Ditùkù dyà Mpenta aci. Ncyà bushùwà. Kaa, mu bushùwà bwà bwalu, bàvwa bafwànyìne kwikala ne badyudi bàà mùshindù wùm wèwùm wè awu mu Louisville emu bàvwàbo naabò kuntwaku abu. Kàdi, bàvwa bwònsò mu mwaba wùm wèpelè, díyì òmwè. Kì dyàkàm wè . . .

¹³⁰ Kujuukakù mwambi kampànda, ne yèyè ùvwa ne mukàndà mumufùndila, ne bààkafùnda mènà àbò ne kwelanganabo mwuyi wà buunyànà, ne kubwelabo mu bwobùm wè bwà èkèleeziyà anyi? Aci's ncifwànyìne kwikala leelù ewu, kàdi kacìvwa aci musangu awu to. Mùshindù awu ke ùdi mwena Mishònyì ùcyènza. Mwena Kàtòlikè yèyè ùdi wàsa lwendu mutàngile ku cyàlàtálà bwà kudyà nkòomunyò wèndè wa kumpàla; ùpàtula ludìmi pambèlù, wàngata cyostiyà aci; kàdi nsaserdòsè yèyè ùnwanwa mvinyò. Pashìishe ùshààla cyòci aci.

¹³¹ Kàdi, mwanèètù: “Mu Ditùkù dyà Mpenta, bàvwa ne díyì òmwè, mu mwaba wùm wè, pashìishe dyàkàm wè kulwakù cyonà cìfùmina mu Dyulu,” muntu kàvwa ne bwalu nànsha bùm wè bwà dyaenza naaCì to, “bu cipeepèlè cicolè cyà civuma. Cyàkùja nzùbu mujimà mùvwàbo basòmbèle amu.” Bukolè bwà Nzambì kudituuta pambidi pààbò! Kupàtuka mu mùsèèsù, benza maalù bu musùmbà wà babùlùke; mwàkenzàbo kuntwaku pààkápìcìlàbo mu Mbù Mukùnze. Ncyà bushùwà anyi? Bààkeela mbilà mikolè. Bàvwa basalùke. Bààkatètuka. Bààkakukumina ne mishìkù yàbò.

¹³² Bwòbò, kaa, disaluka kaayi's, nwènù . . . mu mùshindù wà ne bantu, èkèleeziyà wa luumù awu, kudìtòlabò pa bule bàmba ne: “Bantu aba mbakwàcìke mvinyò mupyamùpyà.

¹³³ Àlèluuyàh! Nenwìkalè mwà kumbiikila mùndì “munsantu mubùnguluki wa mu malaba,” nànsha bishi, pa nanku's mbipìciibwe ne nwènù babangè mpindyewu. Èyo.

¹³⁴ Tàngilàayi, bàvwa bùjiibwe tètè ne Mvinyò mupyamùpyà, ncyà bushùwà, Mvinyò wàkafùmina kùdì Nzambì awu, mu Dyulu. Nukàatukù bamòne muntu mukwàcìke maalà anyi? Yèyè

ùdi ànu munange muntu yònsò, nudi numòna's. Yèyè kèna ùcyùka abi to. Ke mùshindù awu ùdi muntu pàdiye ùkwàcika maalà à Nyumà. Bible mmwàmbe ne: “Kanùkwàciki maalà makolè to, kupicisha ne pa mukenji, kàdi kwikala bakwàcike Nyumà.” Nyumà wa Nzambi ùdi ùkuvwija mukwàcike bikolè, udi upwa ne beena lukunà bèèbè bwònsò mwoyi, ne bikwàbò byònsò. Bantu bwònsò mbakunangè. Yèyè kèna ùcyùka udi mwimàne ku luseke lwèbè awu ne nganyi to. Wèwè ke muntu mutàmbe bunène udiku mu ditunga díbà adi mene.

¹³⁵ Nànsha byòbì ne mwena mutumba neebè, udi musòmbe ku luseke lwèbè awu, mmuyè mu èkèleeziyà kampànda wa lumù; lekèlè wèwè ànu Nyumà Mwímpè àbwelè munda mwèbè kasangu kàmwè nàka, kàdi ùmòne cidì cyènzeka's. Kwàcikèku ànu bìmpè, bìmpè byètù ebi, byà menemene, neùmòne cyènzekà. Wèwè newàmbè ne: “Mwanèètù wa bakàjì, mémè ndi Nendè's! Wèwè pèèbè, udi Nendè dijinga!” Ncyà bushùwà. Èyowà's, mukalenge, cintu kampànda necyènzekè.

¹³⁶ Ki bwòbò abu's, bwònsò bakwàcike maalà ne Mvinyò mupyamùpyà. Nènku, tèelejàayi, bàmwè bàà kunùdi nwènù bàna bèètù bàà bakàjì kaaba aka, nuvwakù bamanyè ne virgò Màriyà mubènèshìibwe awu ùvwa mu cyòci aci anyi? Mpindyewu, byàkakèngela bwà kubàndayè kuntwaku. Bìvwa bikèngela bwà mamwèndè wa Yesù Kilistò àye kuntwaku ne àbadiibwè mu musùmbà wà bantu awu, mukwàcike bikolè mu Nyumà mu mùshindù wà ne wàkatètuka byènze bu ùvwa mukwàcike maalà à wiskí anyi cintu kampànda.

¹³⁷ Nènku udi wela meeji ne neùye mu Dyulu mu kudifinda kwà mu èkèleeziyà ne kupàya mukàndà wèbè wa misambu awu mu dyàpà dyèbè, ne kuyakù dyàlumingu dyònsò mu dindà, nènku pàdi ngonga ùdila apu, ne kusòmbe utèeleja ndambù wa . . .kàdi kwalukila anyi? Kwàdyàkucyènzakù to.

¹³⁸ Nebikukèngèlè bwà wèwè kupicila mu njila awu, bwalu's ke njila umwèpelè udi Nzambi musebè, ne utuyè nendè kacya ne kacya. Nènku newèndelèmu, cyanààna kwàkwikala Mwàmwa to. Mémè ncyèna nkulumbulwisha to, kàdi ndi nyiisha Èvànjeeliyò. Aci's m'Bulelèlè bwà menemene. Virgò mubènèshìibwe awu ùvwa ànuku, kwenzayè maalu ànu bu mucimbàkàne mwàkenza bakwàbò amu, mukwàcike ànu bu bakwàbò abu. Balùme ne bakàjì aba, yònsò wa kùdibo, ùvwa mùle tètè ne Mvinyò mupyamùpyà. Piikalà Nzambi ànu mushintùlùlekù ndongamu awu, mfunkwinèku munu pa Mufundu awu; kawenàmu to. To, mukalenge. Cìvwa ntoo ne ku nshìikidilu kwà cikondo mene, mùshindù awu, too ne ku ndekeelu kwà Bible, ne neciikalè cintu cimwècimwè aci pàalwà Yesù.

¹³⁹ Tàngilàayi! Pàvwàbo bakwàcike Mvinyò mupyamùpyà awu apu, tàngilàayi, tumònebi Nzambi ní mmutèèkekù litres cisaka

cijimà kuulu kwaka bwèbè wèwè. Èyo.

¹⁴⁰ S'ki bwòbò bwònsò abu biimàne mwaba awu, ne muyiishi mukesè wa kale mutulùmuke dîna dyèndè Peetèlò, kaa "lubwebwe kakesè aku," wàkapeta bwòwà bwà kaaba kèndè mu mùshindù wà ne wàkavila Yesù, ne kupàtukayè ne kusambila too ne ku ndekeelu, kàdi byàkakèngela bwà kudisangishaye naabù. Kwimanayè pa kashèètè kàà nsàbangà anyi cintu kampànda, kwambayè ne: "Mòna's, nwènù bantu bàà mu Yudaàya, ne nwènù bàdi basòmbèle mu Yelusàlèmà!" Bàvwa mbaa docteurs, baa D.D.'s. Kaa, yèyè ne: "Nwènù bantu bàdi. . .ne bantu bàà mu Izalèlèlè, ne bàdi basòmbèle mu Yelusàlèmà, ne bikwàbò, eci cimanyiibwè kunùdi. Bantu aba kí mbakwàcike maalà, munùdi nwènù nudìcinkila amu to, pa kumòna ne tucidi ànu pa díbà citèemà dyà ditùkù. Kàdi eci cidi. . ."

¹⁴¹ Eci cyòci kaciyi Aci to, ndi muswè kulama eci too ne pààlwà Aci. Ki cintu cimwèpelè ncyòci aci.

¹⁴² Yèyè kwamba ne: "Eci ncyàkambàbo kùdi mupròfetà Yowèlè ne: 'Nebyènzekè mu matùkù à ndekeelu, mùdi Nzambi wàmba ne, Nèngìcìkijè Nyumà Wanyì pa mubidi wònsò; bânà bèènù balela balùme ne bakàji nebàmbè bipròfetà; ne pa basadidi Bàànyì balùme ne bakàji Nèngìcìkijè Nyumà Wanyì, ne bwòbò nebàmbè bipròfetà; ne Nèndeejè bimanyinu muulu mu maulu, ne pa buloba; ne makunji à kapyà, ne mwíshi, ne mabungi; ne nebyènzekè ne, kumpàla kwà ditùkù dinène ne didi dikwacisha bwòwà dyà Mukalenge kulwadì, ewu yònsò wasòka Dìna dyà Mukalenge awu neàsungidiibwè.'"

¹⁴³ Musùmbà wà bakwidi baditàmishi, bàà mìzàbì mile, ne bàà lubombo abu, kwambabò ne: "Ncinyì citùdi mwà kwenza bwà kusungidiibwa?"

¹⁴⁴ Peetèlò kwambayè ne: "Nyingàlàlaayi, muntu ne muntu wa kunùdi, nùbatìijiiibwè mu Dìna dyà Yesù Kilistò bwà dilekelediibwa dyà mpèkaatù yènù, nènku nenùpete kupà kwà Nyumà Mwímpè." Too ne díbà kaayi? "Bwalu mulayi wùdi kunùdi, ne kùdi bânà bèènù balela, ne kùdi aba bàdi kule, mu búngì bwònsò bwàbìkilàbo kùdi Mukalenge Nzambi wetù abu."

¹⁴⁵ Díbà adi, muntu yònsò udi unyingalala ne mubàtìijiiibwe mu Dìna dyà Yesù Kilistò, ne Nzambi umupèesha dibàtìiza dyà Nyumà Mwímpè, kèna ùpeta cintu kampànda cifwànàngàne ne manà à kumpàla awu to, kàdi, yèyè kèna ànu ùpeta ditàma ntèntè dyà manà à kumpàla awu to, kàdi ùdi ùpeta mwoyi mùle ntèntè ne Nyumà Mwímpè umweumwe awu.

¹⁴⁶ Udi mufwànyine kwamba ne: "Anji pwekeshabi kakesè tũng." Ndi mumanye ne ndi mubàndishepù díyi ndambù, kàdi ncyèna ànu mwà kupanga kucyènza to. Mònaayi, tàngilàayi. Ncyèna nnwèlela mbila to. Pàmwäpa ndi ngènzapù mutooyi be. Kàdi, kaa, bu nwènù badyùmvwè mùmvwà mudyùmvwè, nùnkù's nuvwà kwikala babàndishe díyi bikolè, pèènù.

147 Mònaayi, kaa, mwoyi mûle nténtè ne manà à ku cibangidilu àkamata ku cibangidilu awu; Nyumà Mwîmpè umweumwe wâkamata musangu awu mene, ùdi munkaci mwà kumata mpindyewu. Ne mMufwànyine kuya penyi? “Kunùdi nwênù, kùdi bânà bèenù balela, aba bàdi kule,” mu Louisville, mu Kentucky, “ne mu búngi bwónsò bwàbìikilábo kùdi Mukalenge Nzambì wetù abu, nebâpetè cintu ànu cyôci cimwècimwè citùdi naaci kaaba aka eci.”

148 Ki cyâkambàYe ncyôci aci. Nzambì wâkacibènesha. Wâkaciyiisha. Nyumà Mwîmpè ngwâkaCítwàla; Mémè ndi muCipeté; aci’s ncikòse bwalu. Amen. Aci, aci’s ncilenga cikumbàne bwányi mémè. Mémè kuMukwàcila ku Diyì Dyèndè; Yèyè kucyenza. Wèwè muCiswe, udi mwà kuCipeta, wèwè pèèbè. Ncyà bushùwà.

149 Nàнку pàtukàayi mu—mu ngiikàdilù mufwè, ne tàbulukàayi, ne dinyùkùshaayi ànu mùshindù awu ne nùtàbuluke. Ne cintu cyà kumpàla, udi ukènzakana nènku bintu byónsò nebimweke kùdi bishiilàngàne. Mulùmýànà ùdi wèwè kùyi muswè kwakula nendè awu, neùlwijakaje bwà kufika kùdiye bwà kwakula nendè; èyowà’s, mukalenge, bikèngela ànu bwà kwakula nendè, kwajiki. Kaa, bintu byónsò abi, kwaluja byamù byà mudimu byà kale byà ndundu abi, ne byónsò. . . bintu byùdi mwangàtè mu nzùbu wa cilàala-beenyi musangu awu abi. Cibwikilu cyà kale cyùvwà mujingilemù malòngà à byamu àùvwà mwangàtè pa mèèsà awu; newàlukile lukàsà, bwà kufika ku dibyàluja. Ncyà bushùwà ne neùcyènzè. Èyowà’s, mukalenge. Necikuvwijè cifùkiibwà cipyacipyà mu Kilistò Yesù. Mpindyewu tàngilàayi Màriyà. Kaa, ekelekèle!

Bikèngela tulwijakajè. Tudi twenda tuya bashidimbe.

150 Ki bwòbò bàyaaya aba, bàpicila mu cipèèlà mpindyewu, paanyimà pàà disangisha dyà cyena-kale adi. Mpindyewu mbwòbò abu mu lwendu lwàbò. Kabyèna bikèmesha mùvwabo balombòdiibwe buludi mu Cipèèlà cyà Sin, buludi batàngile ku cipèèlà, buludi mu—mu mpokolo wa màyi à bululu anyi? Nudikù mwà kudifwànyikijila Nzambì ùya ne bânà Bèndè, ànu paanyimà pàà bamanè kusùngidiibwa ne bùjiibwe tèntè ne Nyumà Mwîmpè, ku mpokolo yà màyi à bululu anyi? Bushùwà. Ùvwa muswè kubàleeja dinanga Dyèndè cyàkàbidi. Ncyà bushùwà. Kufikabo kuntwaku.

151 Nudi bamanyè’s, paùdi upeta Nyumà Mwîmpè, udi upicila mu bipùmbishi byàbúngi. “Ntátù yà mwakàne yidi yàbúngi, kàdi Nzambì ùdi ùmusùngila ku yôyi yónsò.” Nzambi ùdi ùkubàndisha buludi, ùkakùngamangana naayi, bwà Wàmòna mwà kukuleeja bukolè Bwèndè ne bwîmpè Bwèndè.

152 Bu mungààkuumvwa bwalu-bulonda bwà mulami wa mìkòòkò mu Yelusàlèma, uvwa mucibùle mukòlò wà mùkòòkò

wèndè. Bwôbò kwamba ne: “Mòna’s, wêwê mulami wa mikòòkò wa cikisu ewu. Bwà cinyi udi mucibùle mukòlò wà mukòòkò?”

¹⁵³ Yèyè ne: “Èè, kaùvwa wenza maalu bu ne ùvwa munnangè to. Ki mêmè kudyàmbidila ne mwya ànu mwà kuwùcibula mukòlò, bwà ngàfwànyina kuwùtábaleela mùshindù wà pabwàwù, ne pashìishe wôwò mmufwànyine kunnanga kubangila ànu díbà adi.”

¹⁵⁴ Míngà misangu bikèngela bwà Nzambi àkulààdikè paanshi, ne bubèèdì, bùdì ngàngabukà wàmba ne neùfwè. Nzambi mmufwànyine kukupèèsha dyondopa dikesè dyà pabwàdì bwà wêwê kuMunangakù kàbidì ndambù. Ncyà bushùwà.

Bàmwè bàpìcila mu màyi, bàmwè bàpìcila mu nkòkà,
Bàmwè bàpìcila mu mateeta makolè, kàdì
bwònsò bàpìcila mu Mashì;
Yesù ùdì ùlombola Èkèleeziyà Wendè.

¹⁵⁵ Mpindyewu, pàvwàbo kuntwaku, ne màyi miikàle ne bululu ne kabàyiku mwà kunwà to, Nzambi wàkaseba njila. Kaamuci kakesè kàà kale kalèlème mwaba awu ku mwelelu aku, Mòsà kukàkòsa ànu cyanààna ne kukèèla mu màyi awu, kushintulula cintu cyònsò nkòong; màyi kulwa mîmpè, matalàle.

¹⁵⁶ Mpindyewu paùdì ulwa bwà kutwilangana ne àmwè à ku màyi èbè à bululu awu, anyi cintu kampànda cikwàbò cyà mùshindù awu, kùdì mucì kampànda, dilòòlò edì, mu ngaakwilù wa nyumà, mulembèlèle kumutù kwà Gològòtá, anyi kwà buloba, dilòòlò edì, kiiikala mwà kutalaja màyi kanà wònsò à bululu awùdì mwà kulombòdiibwakù awu. Ncyà bushùwà. Kàlvaryò nekàtalaje dilabula kanà dyònsò. Misangu yàbúngì tutu tubwela mu myaba ya mikolè, ne tudikonka ne mmunyi. Nàнку ntu musangu mukwàbò mbwita kwìsù, ne ndyambidila ne: “Ku Gològòtá kwàka, kùvwa Mupikudi wanyi ùzòna mashi ne ùfwa bwà mwoyi wanyi,” díbà adi diteeta dyànyì dyàkamwèka dikesè bikolè. Ndi ànu ndiimansha ku luseke ntùngunuka ne lwendu. Cìdì cìcìvwija cisheeme. Cìdì cisheemeja dilabula dyònsò dínkadìku mupetè. Yèyè ùtu misangu yònsò ànu ùdisheemeja, pàndì mfika ku màyi àanyi à Màrah.

¹⁵⁷ Mpindyewu, tukàadi pa kubàbàkula mpindyewu lwà mu cipèèlè emu, paanyimà pàà bimanyinu binène byònsò ne maalu à kukèma. Ditàbuluja díkaavwa ditùukije. Nènku katanci aka anyi, pààkatuukijà ditàbuluja adi, mòna’s, bààkapwa mwoyi bishimà byònsò.

¹⁵⁸ Aci kí ncyenzè ànu mùdì bantu leelù ewu anyi? Bàdì bàpwa mwoyi cyàkenza Nzambi cidimu cishààle. Cyàkenza Nzambi ku disangisha ku cilongelu citùmbùke aku, nudi bacìpwe cyònsò mwoyi. Nwamònu anyi? Cìdì Nzambi mwenzè, tudi ànu tucìpwa mwoyi.

159 Mpindyewu, mōnaayi ne, ànu bwalu bààkabanga kukòkangana muntu ne mukwèndè ne: “Èè, ncyà bushùwà ne mèmè, twamb’eku twamb’eku, ndi Méthodiste. Èkèleeziyà wetù s’ke wa mutàmbe bunène.” “Mèmè ndi Baptiste, ne nēnnwāmbilè mpindyewu mene ne, tudi twitabuuja dikubiibwa dyà Cyendèlèlèlè, ne tudi naaDi. Ha, ha! Nwènu bwònsò kanwèna ne dilongesha adi to, twamb’eku twamb’eku.” Apu’s ke paùdi upeta lutàtù, ne dikupèèshà dyà mâyi èbè adi dikòseka. Ncyà bushùwà. Ncyà bushùwà.

160 Apu’s mpàdi, mu cipèèlà, pàdiye ùpàtuka ùya mu cipèèlà, ùtwàdija kunungana, kunungana ne kudyàbakeena. “Èè, nēnkwanbìlè. Nēnkwanbìlè, pàvwa mpaasàtà mukulakaji awu mwab’ewu, muyiishi mukùlumpè wàkayiiisha ntèndeleeleu wa kale awu mùshindù awu awu, ncyèna—ncyèna mumanyè ní ùvwa mubingè anyi to. Nēnkwanbìlè’s, yèyè—yèyè kusòmbesha mamwānyì kasekeseke, dilòlò kampànda, kwalukilaye kumbèlù. Kàdi nkwambìlè’s, maamù’s wàkabìnduluka, ànu bu.” Bivwa bikèngela kwikalayè munyùkùshiiibwe. Ncyà bushùwà. “Kaa, ncyèna mumanyè ní ndi muswè kuumvwa kàbìdì bikwàbò byà ku Cyòci aci, anyi to.” Nēnku apu’s mpàdi cìfidì cyà mâyi èbè cikànga. Ncyà bushùwà. Apu’s ke paùdi ubwela mu cipèèlà.

161 Kubangabò kunungana. Kwambabò ne: “Misùùkà yètù—yètù mmicyòke ne dyāmpà dipeepèle edi.” Paanyimà pàà bamanè kushìya ayi ne matùngulù byà mu Èjiipitù abi, ne biikàle bàdya byàkudyà byà Banjèlo, kàdi kwikalabò ànu bàdyàbakeena. Aci kí ncìfwànàngàne ne èkèleeziyà anyi? Mpindyewu ndi mpweka mutàngile ku beena cijila mpindyewu, nwènu bwònsò; èyowà, nwènu bwònsò. Bàdya cyàkudyà cyà Banjèlo, ne pashiiishe bàmba ne: “Mvw’a kujinga twàlukila nànsha mu Èjiipitù’s, bwà kupetakù ndambù mukwàbò wa ayi.”

162 “Cisùmbu cyà bimbi cyà Clayton McMichen ne Mbwà yèndè yà diitu ayi nebiiikale mu cinwinu dilòlòlò edi. Bu ne ncìvwa mukashàale wa mu èkèleeziyà wa kale awu to, mvwa mufwànyine kupwekakù.” Bipìcùbwe ne wèwè muyèku’s. Kùdì mabanji èbè aku, s’ke kùdì mwoyi wèbè kàbìdì. Kùvwa mupete cintu nànsha cìmwè pawàkabangisha apu to. Ncyà bushùwà. Ncyà bushùwà. “Kaa, ndi muswe kwenza *cikampànda*, anyi kwenza *cikansanga*.” Kì bwalu mbwòbù abu’s, misangu yònsò ànu didyàbakeena.

163 Kàdi kushiyabò mâyi à bitoci à Èjiipitù, bwà kunwà mâyi makezùke à mu Lubwebwe lwà Bikondo, kàdi biikàle bàdyàbakeena bwà Cyòci aci. Bààkashiya mwaba ùvwa bangàngàbukà banène, bà maditàmbishi bàà mu Èjiipitù, baditàmbishi banène ne byònsò, bwà kwikala ne Ngàngàbukà Munène. Kushiyabò mwaba ùvwàbò bàmba, ne: “Matùkù à bishimà àkaadi mamanè kupita,” bwà kwikala ne bantu bàvwà ne bimanyinu ne maalu à kukèma bibàfila, kàdi biikàle ànu bàdyàbakeena. Kaa, èkèlekèlè! Èyowà’s, mukalenge. Mwómò

amu, mu bushùwà bwà bwalu, beena Èjjiipitù, bàà Bisàmbà byà bendè bakwàte mashika, bàà kabàyi bàcyùka myandà to. Kabàvwa biitabuuja mu cintu pàaci ne mbishimà nànsha.

164 Pashiishe, kupàtukabo mwaba ùvwàbo ne Dikunji dya Kapyà dibànyùngulùkile. Tudi naaDì dilòlò edi's. Bàvwa kuntwaku kùvwàbo ne disànka mu citùùdilu amu, bèèla mbilà, bishimà munkaci mwà kwenjiibwa, ne bikwàbò byònsò, ne pashiishe bàdyàbakeena bwà bwalu abu. S'ke bwà cinyi màyi àkakàma, s'ke bwà cinyi kabàvwa ne kantu nànsha kàmwe kàà kudyà anyi kunwà to, bwalu bàvwa bànungana.

165 Nènku's ke lutàtù lùdì naalu maèkèleeziyà mu Louisville mujimà emu, dilòlò edi; yidi munkaci mwà kunungana, yidyàbakeena. Luse's wè! Alùkilaayi mu cikòkedi. Ki bwalu abu.

166 “Dìbà adi mulùmyànà mwinè ewu nganyi's, Mòsà? Bwà cinyi tudi tutèeleja, tutèeleja muiishi munsantu mubunguluki wa mu malaba ewu, twamb'eku twamb'eku? Citùdì twenza kaaba aka ne dìnà ncinyi?” Ki màyi àbò kukàmawù.

167 Ndi mvùluka Mòsà, muntu munène awu. Ùvwa mulongèshìibwe mu lungenyi lwònsò–lwònsò lwà beena Èjjiipitù. Tumutàngilaayi ànu bwà ndambù wa tusunsa cyanàànà. Twàngatàayi Mòsà, bwà katanci kakesè cyanàànà. Tàngilàayi mulùmyànà awu. Ùvwa . . .

168 Beena Èjjiipitù, bàvwa bayè kule batùpìte twètù leelù ewu, pa bidì bitàngila maalu ètù à mamanya à baamingàngà. Bàvwa batùpìte ne kule. Kùdì bintu byàbùngi bìvwàbo mwà kwenza bitùdì katùyì mwà kufùdisha to.

169 Nènku Mòsà ùvwa ne bwanga bwònsò abu. Nènku pàvwàye kuntwaku, ngèèla meeji, Mòsà ùvwa ne bantu batwè ku miliyò yibidì ku luseke kwèndè. Ùvwa ne bàrà bakesè. Ùvwa ne balùme bakùlumpè, bakàji bakùlumpè. Ùvwa ne bikalàbà, ne mpofo. Bàrà bàà mu mabòkò bàvwa balediibwe, binunu ne binunu, mu ntàntà wa lumingu. Nènku Mòsà, Ngàngàbukà Mòsà, ùvwa ùsanganyibwa mu cipèèlà amu ne bantu bwònsò aba. Ndi muswè kutàpa dísù mu kàfwànkòlù kèndè kàà manga, kî mmwòmò anyi? Ndi muswè kumòna cìvwà naaci Ngàngàbukà Mòsà mu kàfwànkòlù kàà manga aku. Twànjàayibi kupongwela kakesè mu kàfwànkòlù kàà manga amu bwà tùmònè cìvwàye naaci.

170 “Mòsà, mòna's, ncinyi cyùvwàku wèwè mwà kwikala naaci mwòmò amu, Mòsà?” Mòna's, tudi tusangana ne, mu lwendu lwònsò lwà bidimu makùmi ànaayi amu, mwàkalediibwa bàrà bàà mu mabòkò bapìte pa miliyò yibidì. Ncyà bushùwà. “Ùvwa ukwàta mudimu ne cinyi, Mòsà? Ùvwa ukwàta mudimu ne cinyi bwà bìsaamà byònsò abi ne didìnyènga ne kànsèrè, ne bufofo, bumpudimàci, ne bumàmà? Mòna's, mbangambile ne, panwàkapàtuka mu cipèèlà, kakùvwa muntu nànsha umwe ne butekète munkaci mwàbò to.” Amba tùng, bàmwè bàà

ku bangàngàbukà aba kî mbafwànyineku kutàngilamù, mu kàfwànkòlù kàà manga aku anyi?

171 “Kàbidì cikwàbò cintu, Mòsà, ncinyi cyùvwà umyamina bantu abu, mu mùshindù wà ne bilàmbà byàbò kabivwa bisùnsuka to? Bisabaata byàbò kabyàkasùnsuka to, bèndela mu mabwe amu.” Ni nukàdikù bafikè kuntwaku, s’nudi bamanyè mùdì mu cipèèlà, bàdi bàsùnsulula mukòlò wà bisàbaata mu matùkù àsàtù. Kàdi kabàvwaku mene mwà kusùnsulula kapese kàà cisèba cyàbì, mu bidimu makumi ànaayi to. “Mòsà, ncinyi cìvwà mu kàfwànkòlù kèèbè kàà manga?”

172 Tùtapàayimù dísù. Ndi mmumòna: “Mwikale ne kabèjì kàà bwanga kàmwèpelè ne: ‘Mémè ndi Mukalenge udi ukwondopa.’” Aci’s ncikòse bwalu. Amen.

173 Muntu ne: “Kaa, Mòsà, tatwànyì’s ùdi lwà kuntweku, ngùfuma ànu ku didìshinda ne mmucibùke cibelu. Ncinyi cyùdì naaci bwèndè?”

174 “Ngànji kutàngilabì tùmonè. ‘Wèwè mwà kutùmikila diyì Dyànyì, kwenza cyònsò cìNdi mutùme diyì bwà kwenza, Ncyàkutèèkaku nànsha òmwè dya ku màsaamà aa pambidi pèèbè to, bu beena Èjiipitù, bwalu Mémè ndi Mukalenge udi ukwondopa.’ Mwambile nànkù awu.” Ûvwà ùsàngala. Amen. Ncyà bushùwà.

“Kaa, ùdi ùsaama bikolè be! Mwanàànyì wa mu dibòkò ùdi ne munda mùmunyènga, anyì dìsaamà dya bisulusulu, bibì be! Ngàngàbukà Mòsà, cìndì mwà kwenza ncinyi?”

175 “Enzàbi mmonè cìndì naaci’s. ‘Mémè ndi Mukalenge udi ukwondopa.’” Aci’s ncikòse bwalu. Amen. Ki bwòbò bàyaayà bàba. Ncyà bushùwà. Bàtúngunuka, bènda bàcyònkomoka. Ki cyònsò cìvwà cìmukèngela: “Mémè ndi Mukalenge udi ukwondopa.”

176 Mu milayì mishindàme nkàmà yisambòmbò ne byà mu njila, yà dyondopa dya kùdì Nzambì, mu Dipungila Dipyadipyà nkàayadi, kàdi pèètù’s tudì twela Nzambì mpatà, dilòòlò edi. Cilumbulwidi necìikalè munyì bwètù twètù? Cyà bushùwà.

177 “Mémè ndi Mukalenge udi ukwondopa.” Èyowà’s, mukalenge. Ke cìvwà Mòsà naaci ncyòci aci, Ngàngàbukà Mòsà ùvwà mu cipaapu cyèndè, mu wèndè. . . mu kàfwànkòlù kèndè kàà manga, cìvwà ne: “Mémè ndi Mukalenge udi ukwondopa.” Pa nànkù Yèyè wàkondopa màsaamà wònsò awu, ne wàkabàlama ànu mu bupwàngàne, ne kubàpicishila ànu mu cipèèlà amu, kubàbweja mu buloba bulaya. Kaa, ekèlekèle!

178 Bààkashiya bangàngàbukà banène, baditàmishi abu, bwà kwikalabò ne Ngàngàbukà Munène ewu. Bàvwà bashiye musumbà wà bantu bàvwà bakwàte mashika, bàà mmwènekèlu wa kwìsùkwìsù abu, ne kabàyi bàcyùka maalu to, bàmba ne: “Kakùtùkù cintu pàaci ne mbishimà to.” Kadi apa mene, Dikunji

dyà Kapyà òwà dilembèlèle kumutù kwàbò aku. Bantu bàvwa munkaci mwà kwondopiibwa. Bintu byònsò, ne ní ncinyi ní ncinyi cìvwàbo naaci dijinga aci, bàvwa ànu bàbàpèèshaci, kàdi nànsha nànkù bàvwa bàdyàbakeena pààkapangilàbo màyi. Kàdi pashìshe mu ngàsà mudishikàmine wa Nzambi, mu byònsò abi. . .

179 Bu mùdi mu Louisville emu dilòlò edi, munkaci mwà bwònsò bàdi bèela mbilà ne: “Matùkù à bishimà àkaadi mamane kupita. Nsangilu wa Maalu à Dyondopangana ùdi ùteeta bwà kwimanyika dyondopa dyà kùdi Nzambi, mu ditùngà dijimà.” Nwènu kanwàdyàkudiimanyikakù to. S’mbipiciibwe ne wèwè mulekele mpindyewu. Kwèna mwà kudiimanyikaku to ànu mùdi kùyi mwà kwimanyika díbà amu. Neyà bushùwà.

180 Mwab’ewu kùkaadi ndambù wa bidimu, pàngàakabangila mu Jeffersonville emu, mvwa nyiisha dyondopa dyà kùdi Nzambi. Kadivwa dyànji kumanyikakù, nangànga to, bidimu ne bidimu. Cìvwa ncintu cikolè be. Kàdi, mwanèètù, dilòlò edi kùdi mìliyò yà bantu, myaba yònsò, bèela mbila. Kuteeta bwà kudiimanyika anyi? Kwèna mufwànyine kucyènzà to. “Mèmè Mukalenge ngudi mucikùne; Mèmè ngwàcimyamina màyi, muunya ne bufuku, bwà muntu kàlu kucinyènga mu cyanza Cyànyì nànsha.”

181 Mùneemu emu ànu àbìdi àdi panshì aa, mvwa munkaci mwà kutàngila mishààmishà kampànda mikesè pa Lupìngù lwà Budishikaminyi alu. Yìvwa ànu yìsanganyibwa mwaba awu. Tukwàcikwètù atu tùvwa tùsanganyibwa myaba yònsò, mwìshì mwà bukènkè. Ki mèmè kwamba ne: “Ncinyi cidi cyènzè nànkù awu?” nkonka mulombodi awu.

182 Yèyè ne: “Ntùditaayishìshe bwongò bwàtù, makèlèlè dilòlò awu, mu cipeepèlè cikolè cyà mvùla amu. Kubwelayi mu bukènkè amu, nènku bukènkè bùvwà kwikala butùkùbe bìmpè abu, kàdi’s tùvwa tùteeta bwà kujima bukènkè abu. Kàdi’s ke kuditaayishishatù bwongò, mu kuteeta bwà kujima bukènkè abu.”

183 Mèmè ne: “Butùmbi kùdi Nzambi’s wè!” Ngèela meeji ne yèyè wàkadyàmbidila ne mvwa mupàle. Mèmè ne: “Aci’s cidi cimvùlwija bàmwè bàà ku bantu bàdi bàteeta bwà kujima dyondopa dyà kùdi Nzambi ne Bukolè bwà dibìikà dyà ku lufù dyà Yesù Kilistò.” Neùditaayishìshe bwongò bwèbè cyanaàna; kwàdyàkukùmbanakù to. Ditàbe wèwè ànu cyanaàna, ne uye lubilu ku dikubiibwa, mwòmò amu. Neyà bushùwà. Amen.

184 “Akùlà ne lubwebwe, Mòsà,” Nzambi ngwàkambila Mòsà, “ne lwòlù nelùpatulè màyi ààlù, nelùpatulè màyi Èndè.”

185 Mwab’ewu ànu àbìdi àdi panshì aa, mvwa munkaci mwà kutàngila fòtò kampànda mu nzùbù kampànda wa dibandila mpìngù ne bimfwànyi, wa lubwebwe elu lwikale lutuuciibwe. Nènku kumwenekabi ndambù ànu bu kasulù kakesè menemene

kàpàtukilamù, kàà bunène bu bwà lusongo lwà kashìngì. Mémè kudyambidila ne: “Mùshindù mwine wùdì muzòdì ewu mwà kwikala mucimbàkanè’s wè!” Mòna’s, mwanèètù, mémè’s mvwa mufwànyine kunwà kantu aku kukuùmisha bu ne mvwa ne nyòòtà yà bushùwà. Èyowà’s, mukalenge.

¹⁸⁶ Nudi bamanyè civwà cikèngela naaci Mòsà bwà kunwà ku Lubwebwe alu anyi? Yèyè ùvwa ne bantu batwè ku miliyò yibìdì, pa kuumusha nyama yònsò ayi. Bìvwa bìmukèngela litres mitwè ku binunu lukàmà ne makumi àtaanu ku kasunsa, bwà—bwà kunwà, kubànwisha. Àlèluuyàh!

¹⁸⁷ Aci’s cidi cimvùlwija muntu kampànda wa mu ntèndeleele wabò. Nudi ànu ne ntèndeleele bùngì bukùmbàne bwà kuya mu kàlaasà kàà Dyàlumingu mu dyàlumingu mu dindà, kupetakù ànu ndambù mukesè wa mamata bwà kukuboleshakù ndambù.

¹⁸⁸ Mémè ntu munanga kusòmbela ku Mpokolo kùdiwu àfùkuka, àlèluuyàh, makùmbane bwà kuya naanyi mu Cyendèlèlè cyònsò amu. Àlèluuyàh! Ndi ne disànkà mùndì mupàtùke mu kaaba kàà kale kàà mutaleela aku; muye ku mpompì kùdiwu ànu àpòngoloka díbà dyònsò. Èyowà’s, mukalenge.

¹⁸⁹ Bantu bàdi ànu ne ntèndeleele bùngì bukùmbàne bwà kubàvwija beena dikènga. “Èè, ncyèna mwà kushààla musòmbè kupicisha tusunsa tutwè ku dikùmi to. Ekèlekèlè, luse’s wè, muyiishi awu neàjikije díbà kaayi’s?” Lupàndu lwèbè lùdi ne ndòndò kaayi’s? Ncyà bushùwà.

¹⁹⁰ Uya kuntwaku mu dyàlumingu mu dindà, wamba ne: “Èè, nèngànji ànu kuyakù bwà kutèèleja ciikalàbo ne cyà kwamba aci.” Nènku upeta kaadimata kàmwèpelè umba walukila, kàdi’s ke cyònsò cyùdì pèèbè mupete aci.

¹⁹¹ Mwanèètù, lekèla nkwambilè ne, pààkatuutà Mòsà Lubwebwe alu, lwàkamyamina màyi mu cipèèlà cijimà amu. Amen. Èyowà’s, mukalenge. Cintu cimwèpelè, byònsò bìvwàbo naabi dijinga abi, bàakapona ànu paanshì ne kunwà, kunwà, kunwà too ne mwà kùjiibwàbo. Kùcìcìvwa ànu, màyi àbùngì àvwà àlwà, ipacila ku litres binunu lukàmà makumi àtaanu ku kasunsa kàmwè. Fwànyikijàayibi aci, mbantu bùngì kaayi, mùliyò mujimà wà bantu, bantu mìliyò yibìdì mbafwànyine kunwà màyi awu, mu bule bwà kasunsa kàmwè cyanàànà; bantu ne nyòòtà, pa kuumusha tuumeelù, ne nyama, ne bintu bìvwàbo naabi. Kàdi Bible mmwàmbè ne: “Àkapàtuka mabòdyòdyòke.” Àkakungula, mu cipèèlà mwònsò amu.

Mùshindù awu ngùdì Yesù Kilstò ùfla Nyumà Mwìmpè.

¹⁹² Kacyi ànu katùpà kakesè cyanàànà to, bwà kwamba ne: “Èè, ngèèla meeji ne nènye kashààla wa mu èkèleeziyà.” Kaa, ekèlekèlè! “Kaa, ncyèna mwà kutwàla awu mutooyi nànsha. Ùdi ùnjuula mashika pambidi.” Bu wèwè ànu mwà kufwa, udi mufwànyine kuuminyina ne mashika bu wèwè

mwà kufika mu Dyulu, bwalu, mwanèètù, neùtèeleje mutooyi kampànda pawàfikàMu. Bible mmwambè ne bàdi bèèla mbilà ne “àlèluuyàh,” muunya ne bufùku; ditùkù dijimà, bwalu kamwèna bufùkù nànsha. Ncyà bushùwà. Neùfwe bulelèlà pawàfikà mu Dyulu, ditùkù diibìdì muulu Mwàmwa. Èyowà’s, mukalenge. Èè, wèwè ànu. . . ciwàkenza aci, wakaya ne kukwacika ànu ne muteleela cyanààna, ndambù’s.

193 Kwènaku usòmbela paanshi ku mushimì ùdì ùfùkuka, kàdi kuwùlekela ùtùnkumukila paanshi too ne mwàkusukulàwu kukubweja mu. . . àlèluuyàh, munkaci amu, ne too ne paùdì ujìmina wèwè mwinè ne kùyi umanya ne udi penyì to. [Katùpà kàà mukàbà wà mèyi munda mutupù—Muf.] Ke mùshindù ùdì ne cyà kufika.

194 Mvwa ne ciibidilu cyà kwambila tatwányi mukwàbò, papa wanyì ne: “Mukwètù, ndi mwà kwowela’s,” mu kaacijibajiba kakesè aka mu Utica Pike.

195 Didìpu edi, papa kuya naanyi paanyimà apu ne kusòmbela pa cikuuku cyà mucì, kwambayè ne: “Ndi muswè kumòna mùdì wowela’s.” Kaacijibajiba kakesè aku kàvwa kùpacila bondòke bule *ebu*. Mvwa mwimànyine pa kashèètè kàà nsabanga. Mémè kuvùùla bilàmbà byànyi, ne kudikwàta ku dyùlù mùshindù *ewu*, ne kutumpika pa kashèètè kàà nsabanga aku. Mémè kudituuta, bitoci kusàmpuka nseke yònsò, ke mémè kubanga kudìvwànda mu bitoci amu.

Mémè ne: “Udi umòna bìshi’s, Papa?”

196 Yèyè ne: “Pàtuka muntwamu.” Aci ndyowela? Udìvwàndakaja pèèbè ànu mu bitoci nàнку, dìbà dyònsò.

197 Tudi ne bidimba byà èkèleeziyà byàbùngì bidìvwàndì byà mu bitoci, kàbìdì. Ncyà bushùwà’s. Ncyà bushùwà, bidìvwàndakaji byà mu bitoci. Èyowà’s, mukalenge.

198 Dìngà ditùkù, mansèbàànyi kupàtuka naanyi mu bwátù kàdi ki mémè awu muditwe mu kuditàmbisha mùmvwa mumanye kowela; lwà mu Musùlù wà Ohio emu, mu màyi à ipacila bule bwà mètres àsambòmbò. Kwangatayè anu nkapi awu e kunsàkilayè mu màyi amu, wàmba ne: “Mpindyewu patòoke mpàpà’s?” Amen. Àlèluuyàh! Bìvwa bìkèngela mémè kwowela anyi kudìina mu màyi, dìbà adi. Kaa, ekèlekèle!

199 Mbipiciibwe ne wèwè mwibidilàngàne naaCi mpindyewu. Patukà ùkabwele mu mushimì wà ùtùtuka, mùdì Nzambì ùkàngula lubwebwe lwà mu cipèèlà mwàmwa kàdi’s ke kuàpòngolola paanshi. “Akùlà ne Lubwebwe,” mwàkambàYe, “nèнку nelùpàtulè màyi Ààlù.”

200 Pàmwápa, wèwè mulundà wanyì, dilòòlò edi, pàmwápa udi munkaci mwà kubùtuka. Bìvwa bìkèngela wèwè kwakula ne Lubwebwe. Ncyà bushùwà.

201 Pàmwăpa ukààdi muyè myaba yônsò. Pàmwăpa udi muyè mu èkèleeziyà, mukashààle wa mu ba-Méthodistes, ne mukashààle wa mu ba-Baptistes; ne wêwè mubàtonde, ki wêwè kuya ku ba-Presbytériens; ne kwalukila ku beena Mpenta, kùdi ba-Nazaréens, ku ba Pèlerins de la Sainteté ne kakùshàadi. Kàdi kwèna ànu ne luumvu nànsha.

202 Akùlà wêwè ànu ne Lubwebwe, dilòlò edi. Ànu. . . Udi mudítwe mu kuyiikila Nendè anyi? Èyowà. Yèyè wàkamba ne: “Akùlà ne Lubwebwe, ne Lwòlù nelùpatulè mâyì Ààlù.” NeLùpàtulè mâyì Ààlù, bu wêwè ànu. . . Kabyèna bikèngela bwà kuLùtuuta, kàbìdi to. Akùlà ànu Naalù cyanààna. Ànu mu ngaakwilù wà buunyàna, akùlà Nendè.

203 Pàmwăpa ukàavwa kwà ngàngàbukà. Pàmwăpa ukaavwa mwenzè byônsò byúdi pèèbè mumanyè mwà kwenza abi, bwà kuteeta kusàngala. Pàmwăpa wêwè udi mwenzè ànu byônsò bìdi mu bukòokeshi bwèbè, pàmwè ne byônsò, kàdi kùyi ànu mwà kuumvwa bìmpè to. Ngàngàbukà yônsò, udi mubwelèbwèle mu birò byônsò byúdi mufúdishe mwà kubwela abi, ki ngàngàbukà kwambayè ne: “Wêwè udi ànu. . . Kakwèna cìdi mwà kukwenzela to.” Bwà cinyì kwenakù wakula ne Lubwebwe, dilòlò edi? Yèyè neikalè. . . Ûdi ne mâyì à Mwoyi mwaba awu bwèbè wêwè, ùkupèèsha Mwoyi wà wùyiila ne paanshi.

204 Musangu kampànda kùvwa muntu mukàji kampànda, mu Bible, dîna dyèndè Hagàà. Ndi ngèèla meeji kùdiye. Nèku ndi pabwipi ne kujikija; dîbà dyànyi's. Kùvwa mukàji dîna dyèndè Hagàà, ne ùvwa ne mwànà mukesè wa mu dibòkò. Bàakamwipata kuyayè mu cipèèlà, ne nzàbà mukesè umwèpelè wa mâyì. Kudìshaye kakwàcikwètù aku, ditùkù dijimà adi. Kàdi mâyì kujikawù, bu munkàcinkaci mwà ditùkù nànkù, ne mwànà mukesè wa mu dibòkò awu ùvwa wimbidijangana ne mbilà ne mwadi. Tushikù twèndè tukesè atu tukwàte cikòbakoba ne kaaludimì kèndè aku munkaci mwà kùla. Maamù mukwàte ne luse, wa dinanga, cìvwàye pèndè mwà kwenza ncinyi's? Ûvwa mukalàkàse mwaba ne mwaba wònsò ùvwàye mwà kufúdishà awu, bwà kupetakù ndambù wa mâyì, kàdi nànshapù kupeta mâyì à mafi. Kàvwa mwà kwitaba bwà kumòna mwànà ùfwa to; ki kumulekelayè paanshi mwinshi mwà kiitwitu kampànda, ne kuumuka kuya mu ntàntà wà bule bwà lubilu lwà muketa mukùpà.

205 E kudyèla ku binù ne kwakula ne Lubwebwe. Pààkaakulàye ne Lubwebwe alu, Mwanjèlò kumwandamuna wàmba ne: “Hagàà, ndifúkuka kaayi didi difúkuka kuntu kwàka adi's?”

206 Kùvwa ciinà cijimà cyà mâyì, cyùle tètè ne mâyì, cìcìdi ànu citùnkumuka ne leelù ewu. Paanyimà pàà bidimu bitwè ku binunu binaayi, cìcìdi ànu munkaci mwà kutùnkumuka ne leelù ewu. Mpokolo uvwa Hagàà. . .mwaba awu, ne, cìcìdi ànu

citùnkumuka ne leelù ewu. Yèyè wàkaakula ne Lubwebwe, ne Lubwebwe lwàkapàtula màyi.

207 Kùvwa bânà kampàndà bàà beena Ebèlù bààkabwela mu cikùtù cyà kapyà, dīngà ditùkù, ne bààkaakula ne Lubwebwe. Ne Lubwebwe alu lùvwa naabò.

208 Kwàkapatuka muntu mukàjì kampànda mu Sàmaalèyà, musangu kampànda. Ûvwa mutekèshìibwe mu mabòko. Ûvwa mwena mpèkaatù, ne mwikàle ne bintu byàbūngi bilembèlèle mu nsòmbelu wèndè, pàmpwàpa. Kàdi ùkaavwa mutekèshìibwe mu mabòko. Wàkaya ku ciinà cyà màyi cyà Yakòbò bwà kujikija luteetùkù, nènku ùvwa mwà kwalukila. Ûvwa mwà kuya ku ciinà cyà Yakòbò, ne kwalukila. Kàdi dīngà ditùkù yèyè kushikika mulòndò wà màyi awu paanshi, ne ùvwa mwimàne mwaba awu, mutekèshìibwe mu mabòko. Kàdi's ke Lubwebwe alu lwimàne mwaba awu, lwimane ku luseke lwèndè aku. Kwakulayè ne Lubwebwe alu. Yèyè kàdi kumupèeshe mushimi munène mu musùukà wèndè. Kwasayè lubilu kubwela mu cimenga. Kààkalwakù kusuna, kàbìdì nànsha. Wàkapeta Mwoyi. Kwambayè ne: "Lwàyì, kanùmonàayi Muntu udi mungambile byònsò bìndì mwenzè. Kì n'Kilistò ewu anyi?" Yèyè wàkaakula ne Lubwebwe, ne Lubwebwe lwàkapàtula màyi Ààlù.

209 Kwàkadi mukàjì kampànda mukesè ùvwa mutùùlākàje mfranga yèndè yònsò kùdì bangàngàbukà, bangàngàbukà bà mafi, bàvwà bamudyè mfranga yèndè yònsò. Kabàyi mwà kwimanyika mashi à kasùlù awu to. Ùkaavwa pàmpwàpa mweyeke ferme wèndè, ne pàmpwàpa mumusùmbishe. Nènku ùvwa musòmbè, ùluka mìpilù dīngà ditùkù, ki kuumvwayè Cintu kampànda cipweka ne njila. Kwakulayè ne Lubwebwe. Lubwebwe alu kukudimuka e kwamba ne: "WàNdengi awu nganyi?" Kujikaku pààkaakulayè ne Lubwebwe apu. Yèyè kumupèesha mushimi wà Mwoyi, wàkiimanyikà mashi à kasùlù awu. Àkakàma, ne lukàsà lwònsò.

210 Kùvwa mulòmbyanganyi wa kàà pa luse mpofu mukulakaji mwimàne ku luseke lwà cimanu, dīngà ditùkù, wènda ùzakalala ne mashika. Byònsò byàkadīye naabi bìvwa biyè. Nènku's ke yèyè ewu, mwena dikènga, wa bwalu bantu bàmupità ànu kumupità. Kuumvwayè Cintu kampànda cilwa; kwambayè ne: "Ncinyi aci?" Ki yèyè kwakula ne Lubwebwe.

211 Nànsha nànu, bidimba nèndè byà mu èkèleeziyà, bìvwà bimunyùngùlùkile, kuteetabù bwà kumwimanyika, bàmba ne: "Udi utàta cyanàànà. Kwèna mwà kucipeta to. Shààla kule. Shààla ànu mupùwe cyanàànà."

212 Kàdi yèyè wàkeela lubila lutàmbe bukòlè ne: "Wèwè mwànà wa Davidì, ngumvwilèku luse! Ngumvwilèku luse!" Ke kwakulayè ne Lubwebwe, ne Lubwebwe kumupèesha mushimi wà ùfukuka, nènku mèsù èndè kutàbalawù.

213 Lubwebwe lùmwèlùmwè lùvwà mu cipèèlà alu lùdi kaaba aka leelù ewu. Lùdi lùcyònkomoja bantu.

214 Dìngà ditùkù, Yelusàlèrà mùjimà úvwà mwimànyine bwà kumòna mwondopi wa kùdi Nzambi, munsantu mubunguluki wa mu malaba awu, ùbwela mu cimenga; ne ndambù wa bantu mwimàne mwaba awu, bèèla mbila mikolè ne méyì matwè ne: “Hozaana! Hozaana, kùdi Ewu udi ulwa mu Dìna dyà Mukalenge awu!”

215 Bàdi bàdyàmba ne ke bidimba byà èkèleeziyà abu bàvwà mwaba awu ne mizàbì yàbò ayi mivwàla pambidi, biikale ne D.D yàbò ayi kacya milembeleja paanyimà; bàmba ne: “Bambilaayi bàpuwe. Ekèlekèle, s’bàdi bàmvwayishisha mubidi, ne bikwàbò. Bàpùwishaayi.”

216 Yèyè ne: “Bwòbò bàpùwe, mabwe neèlè mbilà mikolè dyàkàmwè.” Cìvwa nànkù bwà cinyi? Lubwebwe lulelèlà lùvwà lwapùke ku mukùnà, kakùyì byanza byà muntu alu, ke lùvwà munkaci mwà kulwa alu, lwenda lùbùnguluka lutàngile mu Yelusàlèrà. Tuumabwe tukesè tùvwà tùnwinaKù. “Akùlà ne Lubwebwe, ne NeLùpàtule màyi Ààlù.”

217 Wèwè dijinga ne lupàndu, dilòòlò edi, akùlà ne Lubwebwe. NeLùpàtule màyi Ààlù. Wèwè mwikàle muntu mutwè cìmpingà, dilòòlò edi; akùlà ne Lubwebwe, neLùpàtule màyi Ààlù. Pawikalà kaaba aka, dilòòlò edi, ne kùyì ne Kilistò to; udi muteetè èkèleeziyà ne èkèleeziyà yònsò udikù, mu cimenga emu, bwà kupeta lupàndu; akùlà ne Lubwebwe, neLùpàtule màyi Ààlù. Nudi nuciitabuuja anyi? Wèwè mwikàle muntu mutwè cìmpingà, muyè kule ne Nzambi, wela meeji ne kakwènakù mpùngà bwèbè wèwè to; akùlà wèwè ànu ne Lubwebwe, ne Lwòlò nelùpàtule màyi Ààlù.

218 Udi witabuuja nànkù anyi, ne mwoyi wèbè wònsò? Udi witabuuja ne Nzambi mmufwànyine kucyènza anyi? Ne mwoyi wèbè wònsò, udi uciitabuuja anyi? Àlèluuyàh! Yèyè ùdi kaaba aka dilòòlò edi.

219 Nènku wèwè usaama, ne muteetè byònsò pa buloba, wèwè kuteeta bwà kubwela mu mulongo wà babèèdi, kàdi kùyì mwà kubwela mu mulongo wà babèèdi nànsa; uvwa mupete kartà kàà disambila, kàdi mukàdyombòle; uvwa muyè ku disangisha kampànda, wèwè kuya ku dikwàbò disangisha; udi mulaabiibwe maanyi kùdi mpaasàtà; udi mupicile mu mulongo wà babèèdi ewu; uvwa muyè myaba mikwàbò yònsò, kàdi kùyì mwà kwondopiibwa nànsa, bwà cinyi kùyikù mwà kwakula ne Lubwebwe mpindyewu? Lwòlù nelùpàtule màyi Ààlù. Ncyà bushùwà. Cyùdi kùyì uteetela kasangu kàmwè ncinyi? Lengèjà Nendè malanda, mpindyewu mene, pàcidiYe mu nzùbu emu apa.

220 Bwikadi Bwèndè bùdi kaaba aka mpindyewu mene bwà kwondopa muntu ne muntu wa kunùdi. Ndi nciitabuuja, ndi mucimanyè ne mwoyi wànyì wònsò. Ntu ngiitabuuja mu...

Kùdi bintu kampànda bîndi nciyi mumanyè to, kàdi kùdi bintu kampànda bîndi mumanyè bulelèlè, ne ndi mumanyè ne Yesù Kilstò, Mwànà wa Nzambi udi ne mwoyi, ùdi kaaba aka mene.

221 Pândi nteeta mene bwà kwenza dibiikila dyà ku cyoshelu mpindyewu mene apa, mu mwoyi wanyi, bikèèna-kumòna kàdi ke kubwayikabi eku mu nzubu mujimà emu ànu—ànu mpindyewu mene. Kaa, ncyà bushùwà. Makolè à Nzambi àdi mwaba ewu mene. Ncyà bushùwà. Ngàmumònu ùpatuka mwaba ewu. Mbitwàdije kunguumusha mu eci cipaapu kuntùma mu cikwàbò, mpindyewu mene; bwalu kùdi babèèdi kaaba aka, ne masambila ènù ke àdi àcyènzà; bwà kushindika Diyì dyà Nzambi, wàmba ne Yèyè ùdi kaaba aka mene bwà kwambiibwàyè, dilòòlò edi, Lubwebwe lùmwèlùmwè lwàkiimana ne kumanya meeji àbò alu. Kumòna mwaba wùvwà mukàji awu ùsanganyibwa, uvwa ne disaamà dyà mashi àlwa munda kasùlù awu, ne bikwàbò. Yèyè ùdi kaaba aka patùdi twakula apa. Wèwè mwakùle Nendè, Yèyè neàpatulè màyi Èndè. Udi witabuuja aci ne mwoyi wèbè wònsò anyi?

222 Udi wela meeji kaayi, inàbànzà? Wèwè udi ne... Ànu lwà munkàcinkací amu awu. Mpindyewu, kwèna ne kartà kàà disambila nànsha kàmwè to, mmwòmò anyi? Inàbànzà udi ne cintu citòòke cijingila mu nshingù, musòmbe ànu lwà mwaba awu. Udi ne disaamà dyà nsùkaadi, kí mmwòmò anyi? Kwèna ne kartà kàà disambila to, kí mmwòmò anyi? Kabyèna bikukèngela kartà kàà disambila to. Udi witabuuja nànkù anyi? Udi wela meeji ne udi mwà kwakula ne Lubwebwe anyi? Udi muswè kwakula Nendè, bwà disaamà dyèbè dyà nsùkaadi adi, mpindyewu mene anyi? Nànkù juukilàku kuulu. Ncyà bushùwà anyi? Ambà ànu ne: “Ndi ngiitaba Yesù Kilstò mpindyewu bu mwondopi wanyi,” ne Nzambi neàkufikishè kumbèlu ne neàkusàngàjè. Akulà ne Lubwebwe. Nzambi àkubènèshè. Èyo. Ndàaku, usàngalè.

223 Udi wela meeji kaayi bwà bwalu abu, wèwè ùdi musòmbe ku luseke lwèndè ewu, inàbànzà? Udi ne mijilu yà mu mikòlò myùlè, kí mmwòmò anyi? Ncyà bushùwà. Juukila kuulu. Udi musòmbe ku luseke lwèbè aku awu kí mbàyebè anyi? Ncyà bushùwà anyi? Udi ne disaamà dyà nsùkaadi, wèwè pèèbè, kí mmwòmò anyi? Ncyà bushùwà anyi? Tentèkèla mukàjèèbè cyanza. Èyo. Nwènu bwònsò bàbidi nudi bàà mu Illinois. Kí mmwòmò anyi? Mpindyewu nudi nwalukila ku Illinois, nwenda nwakula ne Lubwebwe, nènku nebinùshilè kaaba ne kabýàdyàkupinganakù kàbidi to. Àlèluuyàh!

224 Ndi mumanyè cintu cìmwèpelè ne, Lubwebwe alu lùdi apa, Lubwebwe lwà Bikondo lwàkатуuciibwà mu cipèèlè alu. Ncyà bushùwà.

225 Udi wela meeji kaayi bwà bwalu abu, inàbànzà mutekète wàwa udi ne bilòngò ku cifulu cyèbè awu's? Musòmbe mwaba

awu ne binyòka, ùteeta bwà kubicimuna. Wêwè ùdi mukùdimuke ne mutàngilè luseke lukwàbò awu, udi witabuuja ne mwoyi wèbè wònsò ne Nzambi neàkwondòpè anyi? Nàнку juukila kuulu, ne tumpika ne makàsà èbè, ne wàmbe ne: “Binyoka byäyi,” nènku ke mùdìbi. Akùlà ne Lubwebwe, ne Lwòlù nelùpatulè...? . . .

²²⁶ Ndi nnwàmbila ne, Yesù Kilistò ng’umweumwe awu, makèlèlè, leelù, too ne kashidi. Yèyè ùdi kaaba aka bwà kumwènesha cintu kanà cyònsò cidi. . . .

²²⁷ Udi wela meeji kaayì bwà bwalu abu, inàbànzà udi musòmbe pààpa wàwa, mwambè ne: “Mukalenge àtumbè,” ne disaamà dyà bânà bakàji adi, udi mulwàte kaankooci kakesè, kènze bu kàà màyi à matàmbà, musòmbe kwàka? Udi witabuuja ne Nzambi mmukwondàpe ànu piine apu anyi? Juukilà kuulu, katanci kakesè cyanàànà; wêwè ùdi musòmbe mwaba awu mene. Udi witabuuja ne mwoyi wèbè wònsò anyi? Udi ne disaamà dyà bânà bakàji. Cintu’s ncyùjà. Udi ne kaandundu, màyi à mùshindù kampànda àdi àpòngolokelamù. Kí mmwòmò anyi? Byòbi nàнку, elà cyanza muulu. Ncinyi cidi cingambisha nàнку? Lubwebwe ke lùdi lwàkulangana neebè. Akùlà ùMwandàmùne, ne ùsàngalè. Àlèluuyàh!

²²⁸ Kaa, mùshindù mwìnè wùdiYe muswè kutwàla dimwèneshiibwa Dyèndè dyà bukolè Bwèndè’s wè! Nènku ndi mmòna Mwanjèlò wa Nzambi, Dikunji dyà Kapyà dimwèdimwè dyàkalonda bânà mu cipèlèlè adi, munkaci mwà kutentemuka mu nzùbu emu mpindyewu.

²²⁹ Ndi nteeta bwà kumòna mwaba ùdi mukàji kampànda. Ùdi munkaci mwà kusambila. Ùdi penyì mwaba ewu? S’ki Yèyè ewu mwimàne. Èyowà, mmukàji mukesè mwimàne mwaba awu mene, mwibìdì mmusòmbe munda amu. To, yèyè. . . Mbwa bwalu bwà muntu mulùme, mwimanè. Mbayebè kanwàyi ùdi munkaci mwà kusambidila. Kí mmwòmò anyi, inàbànzà? Byòbi nàнку, juukilà kuulu ànu kùdi aku. Kwènàku ne mulùme kanwàyi ùvwà usambidila anyi? Ní ncyà bushùwà, elà cyanza muulu. Akùlà ne Lubwebwe, ne Nzambi neàmupàtùlè mu—mu cintu aci.

²³⁰ Nzambi neènzè ní ncinyi ní ncinyi cyònsò muneemu emu, bu wêwè ànu mwà kucyènza. Udi ucìitabuuja anyi? Udi munkaci mwà kuyiikila Nendè anyi? Byòbi nàнку, juukilà kuulu mpindyewu mene ne àkùlà ne Lubwebwe, ne Lubwebwe, nelùpàtule màyi Àlù. Udikù mwà kujuukila kuulu anyi?


²³¹ Udi muMuswè bwà lupàndu nganyì? Elà cyanza muulu, wàmbe ne: “Ndi muswè Àbwele mu mwoyi wànyi.” Nzambi àkubènèshè. Nzambi àkubènèshè. Nzambi àkubènèshè. Nzambi àkubènèshè, ne wêwè, ne wêwè, ne wêwè. Kaa, ekèlekèle! Èyowà’s, mukalenge.

²³² Kànsèrè aku nkakuumuke mwab’awu, mwanèètù wa balùme. Nkayè. Udi mwà kwalukila kwèbè kumbèlu ne kusàngala mpindyewu. Àlèluuyàh! Aci ncilelèlè.

²³³ Bwônsò bàdì baswè kwondopiibwa abu, elàayi byanza muulu, nwâmbè ne: “Mukalenge, ndi ngàakula Neebè. Ndi ngàakula Neebè.” Ncyà bushùwà.

²³⁴ Ki yêyè uyààya wàwa. Mukalenge, mutù wèbè wà kapàla awu mmukuumùke mwaba awu. Wàsùùluku. Alùkilaaku kwèbè kumbèlu; mu Dîna dyà Yesù Kilistò, udi mwondòpiibwe.

²³⁵ Muntu kanà yônsò mwab’ewu, udi muswè kuMupeta mpindyewu awu, elà byanza muulu wâmbè ne: “Twasàkidila, Mukalenge, bwà dingondopa. Ndi ngàakula Neebè, mu Dîna dyà Yesù Kilistò, bwà Wèwè kungondopa.”

²³⁶ Éyi Nzambi, wa luse, tûmaaku bukolè Bwèbè dilòlò edi, ne dilaabiibwa dyà Nyumà Mwîmpè, pàdìYe mu nzùbu emu mpindyewu apa, bwà kutangalaka mu batèeleji aba. Nènku swâkù bwà Nyumà Mwîmpè ènzè cishimà cyônsò. Swâkù bwà kakùshàadikù mubèedi anyi muntu mucibùkile paanshi mu nzùbu emu dilòlò edi to. Swâkù bwà Òndopèku muntu ne muntu, mu Dîna dyà Yesù Kilistò. 

54-0330 Bupikudi Mu Kaabujimà, Mu Disànkà
Church Of The Open Door
Louisville, Kentucky États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org